

西園聞見錄

西園聞見錄卷之五十二目錄 外編

兵部一

邊防前上

九邊通考

九邊總論

前言

楊溥

薛瑄

丘濬 二則

魏煥 五則

余珊

馬文升 二則

尹耕

劉鳳

金獻民

蔡時鼎

佚名

佚名

佚名

佚名

申時行

許論

往行 四

三關

前言

魏煥 四則

譚學

余子俊

叢蘭

王瓊

往行 四則

三衛

前言

魏煥 六則

王瓊

佚名

佚名

佚名

兀良哈 四則

申用懋 二則

馬文升

鄧閱

屈伸

尹耕

往行 四則

西園聞見錄卷之五十二 外編

嶺南 張 萱孟奇甫 輯

兵部一

邊防前上

九邊通考

我國家驅逐胡元混一寰宇東至遼東西盡酒泉延袤萬里中間漁陽上谷雲中朔代以至上郡北地靈武鞏蘭河西山川聯絡列鎮屯兵帶甲四十萬據天險以制諸夷全盛極矣初設遼東宣府大同延綏四鎮繼設寧夏甘肅薊州三鎮鎮守皆武職大臣提督皆文職大臣又以山西鎮巡統馭偏頭三關陝西鎮巡統馭固原亦稱二鎮遂爲九邊弘治間設總制于固原聯屬陝西諸鎮嘉靖間設總督于偏同聯屬山西諸鎮鎮戍之嚴未有過于今日者

九邊總論

卷之五十二

前言

楊公溥曰狂胡匪茹分道憑陵東犯薊鎮則九重震警西犯偏關則三晉騷動今按各邊地勢旣殊戰守互異薊州昌平保定三鎮有牆可恃但乘高據險匹馬不入卽爲上策宣大遼東山西四鎮無牆可守難保不入但堅壁清野使虜無所獲卽爲中策薊昌合聽督臣修補邊垣分兵戰守宣府山南東路咫尺昌平四海子至八達嶺皆賊徑宜統重兵護南山以衛陵寢雁門寧武偏頭均山西門戶雁寧外寄大同而偏頭西連延綏獨當虜衝邊長八百餘里兵不滿萬故科臣議撤擺邊止令居中相機戰守保鎮紫荆倒馬龍泉頗稱天險蔽以宣大必偵虜南窺洪蔚后乘牆拒守大同外與虜隣先年總兵梁震每伺虜入寇輒命勁兵搗巢虜畏之今用此可以禦虜遼東一鎮濱海鄰夷中通一線之路兵食仰本鎮地腴收稅惟艱荒豐積足以稱雄矣

薛文清曰治夷狄之法只當謹守疆場勿使侵軼而已窮治不已必爲中國患如秦皇漢武是也

丘公濬曰邊關一帶東起山海以次而西于其近邊內地之廣狹險易沿山種樹一以備柴炭之用一以爲邊塞之蔽于以限虜人之馳騎于以爲官軍之伏地每山埽之側平行之處隨其平勢高下曲折種植榆柳或三五十里或七八十里若其地係是民產官府卽以近便地撥與草場又在官地如數還之其不願得地者給以時價除其稅租又先行下法司遇有犯罪例應罰贖者定爲則例徙三年者種樹若干杖笞以下以次遞減照依繕工司運水和炭事例就俾專業種植之人當官領價認種某樹若干長短大小皆爲之度以必成爲效有枯損者乃責其賠其所種之木必相去丈許列行破綻參錯蔽虧使虜馬不得直馳官軍可以設伏仍行委所在軍衛有司設法看守委官巡視歲遣御史人員督察之不許作賤砍伐違者治以重罪待其五七年茂盛之後歲一遣官採其技條以爲薪炭之用如此則國用因之以舒民困因之以解而邊徼亦因之以壯固矣

丘公濬曰今日備邊之地東起遼東西極隴蜀非但若宋人之邊地起

麟府盡秦隴而已洪武永樂之盛所守不過數處然皆據其總會扼其要害人聚而力全而虜之來有以待之得以全力而制勝也正統以後分爲堡塞日多軍卒之數不減前日而堡塞之設日益加多誠有如歐陽修所謂吾兵雖多分之而寡彼衆雖寡聚而爲多者也今兵無可添而堡塞不可減乞勅知邊事大臣躬臨邊境審視堡塞之設若非要害或雖要害而兵力寡少不足以守之處革其稍緩者而併歸于最要害之地如此則城堡不虛設而將卒皆有用矣

魏煥曰今之四夷北虜爲急國初設大寧都司屯重兵鎮之其地繞出山後與遼東宣府大同勢相連屬自偏頭關踰河跨西北大虜之警守在東勝河套之南又有榆林實爲六鎮後棄大寧移置都司于保定而宣府遼東勢始分矣正統以來有司又失東勝大虜乃得逾河而偏頭關迤西遂有河套之虞因循既久有司又不肯以時巡套內地形勢愈弱于是所賴以衛京師防邊虜者不過遼東宣府大同榆林四鎮而已夫四鎮所領各堡亦有精壯苟足其糧餉守備等官勤加巡哨爲之牽

連援救自足以各守地方督率耕牧從古備邊之道也今則撫臣假調操以自固將帥假按伏以爲奸軍士乏正支之糧而將帥等官反以尅減行糧爲務地方屢失糧餉屢乏實此之故矣若哈密之失守吐魯番之拒命則由置制失宜不足爲慮而亦不刺一種竄于陝之西海地方蔓延至于西寧使一帶地土不得耕種土民不得安業直抵洮岷頗難制禦則其勢有不可不慮者今惟有痛革調操按伏之弊堅壁固守勤加巡哨爲耕牧長計而無徂近利乃可爲也

又曰兵忌形露賊來不知我之虛實必攻墩誘我我不往應但分兵按伏于屯堡或依山林或阻溝澗乍隱乍見使賊見我屯堡處處有兵而不露多少之形攻墩又不往應自生疑懼矣及賊散入屯堡又被我伏兵擒斬彼敢復侵入乎今或一聞賊來攻墩卽發兵擡營往救賊反得以設伏誘我繼我不爲所誘彼常以精兵數千絆我于外堡塞之內盡爲蹂踐矣若使我兵不受其絆于外彼敢無忌憚若是乎哉故將不得人亦不可以言按伏者矣



又曰近之善守邊者每十餘墩必總委一官提調十墩之中擇一可守者先儲米數石水數缸賊近邊卽斂十墩之軍共處一墩止留善走者一人舉烟放炮又潛來共墩而處賊若攻墩不分有軍無軍墩內俱寂然無聲彼攻空墩常多半日之勞而卒無所得攻有人之墩則輒木石擊傷相繼來者見我各墩烟火齊舉卽莫測孰爲無守而自畏矣所謂以靜制動以逸待勞常致人不致于人者此類是也然此法須先遠探賊往之處我乃提兵問道而往復于要害誘而取之乃爲得策今皆不揣敵情不分奇正一概鳴鼓遽出兵未集而形已露曾何益乎故將不得人凡調操按伏反爲邊防弊政故不得不痛革者况帝王之道以全取勝此固在所不講者也

又曰方今沿邊之守有營有堡有墩有空有巡探有按伏有備禦以分其任有將領以總其權有遊擊以備調發有總領以司機權防守之道備矣而地方抄虜之失未見息肩此其故何也攻守無策而偷情之風相襲也文法太密而巧避之術太多也斥堠不立而勇敢之氣未倡也

功賞不明而激勸之道未盡也兵法曰善戰者先爲不可勝以待敵之可勝夫謹斥堠練士卒據地形利器械信賞罰厚儲峙先自治者皆爲其不可勝也以是制人敵而後敵無可勝之兵今之將領安居而巡警無方精銳買閑而疲病乘障不爲不可勝之算而勤于勾審詞訟若有司然不練之兵無謀之士有生之氣無死之心翕情相仍自衛且莫之能而况驅之使戰也哉假令五路備禦各率所部分于近邊要害無影射無買閑無役占無市法身先士卒捍衛有法練習有時可以橫行匈奴矣夫墩空者烽火之緩急也今之遠斥堠時巡邏嚴哨探本以防範也卽不幸有卒然之虜過而掠之驅而戕殺之則死者不論其功而守者先當其罪降責戍遣而刑辱之若不與焉人見以此迨罪也則舉墩空之人巡探之卒環而坐之堅城之中溝壑之間出入若罔聞知卽虜抄掠襲其老弱以還喪失損傷匿不以聞虛文巧飾扶捏勘報則終焉無事矣夫繩人以法而不諒之以情何乃自若取罪哉夫法以防奸情以逮下可相循而治也今不緣情以論法而拘拘焉惟勘委是聽人且

求避之之術矣爵賞者奔走豪傑之大機非明與決亦徒焉耳兵法曰  
軍賞不踰月經曰賞延于世功懋懋賞下至末世猶知愛敵袴也乃今  
冒功有法買功賣功有法其他條格亦甚備矣邊人之親冒矢石幸而  
成功者盼盼焉無所控訴而陞職世襲率勢豪統緒之徒固已失志矣  
萬一獲紀錄焉而又苦于勘驗之搜求刑法之逼迫打點之需索日益  
不足矣是故恩每濫于平人而威恆加于下卒此之謂廢賞而失刑文  
法不弛則巧避之術生功賞不明則偷情之習長而斥埃之不立勇敢  
之不倡自上玩之也余之所謂弛文法者非置之不問也審其事機之  
所由來者也

又曰國家設六邊以馭胡惟開原歷興中大寧抱紅螺跨獨石以達諸  
宣府自宣大迤西抵甘肅勢如率然首尾相援天設之險而創造之艱  
也永樂初有渡江之役兀良哈効順遂以興中大寧與之掣大寧都司  
于保定于是紅螺白雲之北因而失險退守錦義寧前喜峯三屯密雲  
白羊以達居庸自是宣府左臂受衝盧龍後背偃偻遼之噤吭傾硬諸

陵亦時警嚴烽候矣夫不復興中大事則寧前前一扼地耳自潮河川喜峰口以窺盧龍則樂平騷然矣自黃花白羊則諸陵震驚矣宣府之外藩圍之日析也言而至此未嘗不嘆其失之之易而惜其復之之難也當是鎮者其尙念哉

余公珊曰備邊之法不過攻與守而已而攻守之具必先有備而後無患今之胡虜犯邊動號數十萬出于意料之所不及而我兵數少止可分守保隘不敢輕動以待其來來而不去始聞朝廷請給兵糧往來動經旬月緩不及事以致于敗正金人所謂待汝家議論定我已過河矣應變之機豈其然哉夫虜之來也必有其處某處可以通虜常行者料亦不多我于其處先備芻餉揀設精兵或募土著共充其數緩處可數千急處可數萬屯守于此命一大將統之不時訓練以爲戰兵專俟敵之來若敵勢銳銳我且據險按兵不與迎戰堅壁清野俾虜無所掠彼必不能持久可坐待其困而勢自分然後我兵奮力追躡其後彼若又復鳥集再圖反拒我則乘其未合勻呼各處戰兵四面夾擊則我以逸

而當其勞彼以老而當吾銳未有不克捷者至于遼東宣府大同延綏寧夏甘肅平涼等處邊地均入化內豈無山川險易林木疏密數虜騎趨避可守可屯可牧處近年以來因循怠弛斬木捕獸自析其藩籬墜水決沙自填其溝塹虜得馳騁肆無顧忌爲今之計莫若勅各邊巡撫大臣履畝周巡務求其地可以屯種必得趙充國之金城萬斛某處可以牧放必如王毛仲之雲錦成羣浚若干塹濠以謹禁防增何處墩臺以明斥堠凡榆柳要徑可植可塞可以分據而參修者靡不條具聽總制料理以責成功如往來經略花馬池等處故事則攻守有具臨事無倉皇失措之虞而夷虜可常制矣

馬文昇曰我太祖高皇帝膺天眷命奄有萬方以西北設陝西行都司于甘州山西行都司于大同萬全都司于宣府又于喜峯口古惠州地設大寧都司遼陽遼東設遼東都司陝西寧夏卽趙元昊所居地設寧夏左等五衛而遼之廣寧尤北虜要衝復設廣寧等五衛與各都司并寧夏威遠重鎮焉時封肅王于甘州慶王于寧夏代王于大同谷王于宣

府寧王于大寧遼王于廣寧以藩屏王室捍禦胡虜凡有不廷卽命王子討之所以三十餘年胡虜不敢南牧迨我太宗文皇帝遷都北平始徙大寧都司于保定府而其所屬營州等一十餘衛亦省入順天永平二府地方時谷府國改湖廣之長沙還寧府于江西之南昌還遼府于湖廣之荊州乃以大寧之地自古北口至山海關立朵顏衛自廣寧前屯衛至廣寧迤東白雲山迤東至開原立福餘衛處虜之附近者旣又以開原東北至松花江海西一帶金之野人女直分爲二百七十餘衛所留賜印置官官雖多寡不一皆選其酋長及族目授以指揮千百戶間亦以野人之向正者爲都指揮都督統之爲我藩屏而松花江東北一月之程所謂黑龍江之地則又立奴兒干都司時遣使往招諸夷有願降中國者于開原設安樂州遼陽設自在州居之皆量授以官任其耕獵歲給俸如其官當時各衛夷人每入貢賚賜殊厚以故凡迤北征討皆聽調遣毋敢違越永樂末招降之舉漸弛而建州女直先處開原者叛入毛憐自相攻殺宣德間朝廷復遣使招降之遼東守臣遂請以

建州老營地界居之老營者朝廷歲取人參松子地也名爲建東州初止一衛復增之左右二衛而夷人不過數千然一歲遣使各百人入貢以爲常其地則遼東自山海關直抵開原道路如一之字南瀕大海三面皆夷虜至爲難守其性則建州女直譎詐過海西海西過朵顏等三衛蓋海西建州馬步能戰而朵顏三衛止長于騎射故也自北虜也先猖獗之後三種遂皆歸之正統十四年也先犯京師脫脫不花犯遼東阿樂出犯陝西各邊俱失利而遼東被殺擄尤甚以故朵顏三衛并海西建州夷人處處蜂起遼東爲之弗靖者數年至景泰後始克寧謐而海西野人女直之有名者率死于也先之亂朝廷所錫璽書盡爲也先所取其子孫以無授官璽書可徵不復承襲雖歲遣使入貢第名曰舍人以是在遠不得乘傳置錫宴不得預上席賞賚視昔又薄皆忿怨思亂遼東咸知之而特未有以處之也積至成化二年建州都督董山等梟桀雄黠乘是以動海西之夷擁衆入寇守臣以聞朝廷遂命太監黃順總兵官武靖伯趙輔左都御史李秉往討之輔等旣降董山則逮赴

京師而山仍桀驁比行至廣寧輔等以爲山若復歸貽患必大朝廷遂誅山而安置其黨于兩廣福建且復進攻之時克捷而所失亦不少矣然邊境亦賴以寧至成化中元之遺孽滿都魯僭稱可汗虜酋乜加斯蘭爲大帥節犯宣府聲勢甚大警報殊急予以兵都右侍郎奉命整飭遼東邊備以防胡時成化十二年八月也九月卽抵遼東遍歷險要繕城堡練兵士選精壯凡所以爲防虜計者罔不殫心竭力虜人覘知我有備遂不復發適山東左布政陳公鉞以右都御史來巡撫遼東後予而至凡備禦都指揮等官輒逮于理旣當法則止罰馬罰草而復俾蒞戎政由是馬之價皆削諸軍士不復顧忌予旣防胡歸京師則以十五事上陳而禁巡撫官罰馬于軍職者亦與焉陳遂以爲隙先是海西兀者前衛都指揮散赤哈上番書言開原驗放夷人管指揮者受其珍珠豹皮兵部移文遼東守臣勘之管指揮者懼乃因本衛都督產察係散赤哈姪入貢歸賄求產察言官實無所受散赤哈聞之深怨產察聲言聚衆犯邊邊將以情報守臣乃譯番書招散赤哈來廣寧面折散赤



哈遂率所部數十餘人欲由撫順關進赴廣寧時參將周俊等守開原恐散赤哈至則真情畢露乃遣使馳報廣寧守臣詭云海西人素不由撫順關進恐熟知此道啓他日患守臣不虞其詐也卽召其使速阻之時散赤哈已入關聞之大怒折箭誓恨復至撫順所備禦都指揮羅雄知事不協具酒食慰遣出關時建州三衛女直亦欲報誅董山之怨而全籍海西之勢緣此遂留散赤哈于建共來犯邊勢漸昌熾向使不阻散赤哈以啓之邊患爲之息矣守臣以聞乃招王兵大征建州而出榜示衆徒張虛聲實皆顧戀于家不趨遼陽三衛遂得糾合海西人衆數千于十四年正月乘西入境大掠鳳集諸堡至廣寧陳懼始赴遼陽而寇出已久矣獨近邊土著虜人也僧格等十八人家皆有使入貢未還恐誤罹兵禍及拘留其使乃走撫順所報訴云犯邊者皆海西人陳與分守遼陽副總兵韓斌意在撲勦人以掩罪皆收繫瀋陽衛乃乘夜率諸軍襲各寨屠之訖無所掠人畜而精壯者間亦脫去暨回遂捶死也僧格于獄乃以搗巢之捷聞時太監汪直勢焰方熾惑于通事王英謂

往撫可邀大功上命司禮監出駕帖太監懷恩以直年少喜功于本年三月初四日同太監譚昌等七人至內閣傳宣兵部尚書余公子俊侍郎張公鵬暨予比至僉言彼既有使入貢卻又屠其家今若之何可以弭彙或言宜以大官酬之予曰官不足以釋其忿且宋以李繼遷爲京官遂致西夏之患懷公曰然則遣大臣全大通事往撫之衆皆曰諾尋宣至內府懷公傳旨建州夷人被大軍征勦恐懷疑懼着兵部侍郎馬文昇大通事詹昇前去撫安已而王英卽謁予于私居喻汪太監意欲請與俱予遂謝絕之卽行汪深以爲恨衆皆爲予懼予以事關朝廷亦無所恤乃疾馳追及入貢夷使重陽等于中途四月初五日抵撫順所先縱重陽左右一二人歸諭其衆使知朝廷意旨遂有十數人來見卽諭以前意遣歸尋召各衛酋長聽宣璽書由是累累皆至而被屠之家數百人悉訴其方遣使入貢無犯邊狀而冒賞殺戮又果無刼掠人畜可證今雖仰荷朝廷招安實難以度日子遂承詔各以牛布給慰之且令其酋長赴京適微聞海西雖來聽撫猶思寇掠始歸乃于東寧衛訪

嘗爲建州經歷識字熟女直趙安以招降爲名陰探于渠魁卜刺答所  
果有海西兵馬與否不數日趙安歸云有賊數千而馬悉臙壯時分守  
開原太監韋朗亦遣人來言海西賊俱動若來遲恐勢不可撫予遂以  
建州事聞于朝且言夷人雖暫聽服觀其言貌詞氣尙懷反側難保遽  
安仍移文總兵官歐信副總兵韓斌參將崔勝各率所部及調開原參  
將周俊帶領開原鐵嶺精卒三千各分伏鳳集堡一帶賊以爲無備矣  
予至開原甫三日果數路入寇諸軍以逸待勞遂斬首二百餘級生獲  
十數人及賊馬器仗無算而所斬者率多海西人馬參將崔勝周俊馳  
報陳陳掩爲己功予因并前所論反側情狀及申虜人背逆天道旣聽  
招安旋復入寇以自取滅亡之禍請移遼東兵勦之或旣奪其心而始  
與更新招撫遣通事指揮李璟聞諸上事下兵部以爲虜人旣入安撫  
垂成只仍招撫以安靖地方朝廷從之海西人聞之且感具懼都督產  
察等盡歸降乃一體諭之遣其酋入京而遼東守城捷報十數日方至  
以故賞皆不行陳以是嫌隙益甚夷旣降予猶慮其踵舍人之怨則檢

其先授官子孫之未襲者皆令來見譯審實請兵部于內閣驗受官璽書底籍明白再遣遼東守臣勘實令襲官者復十數人夷愈感激汪以夷既招安曷又入寇復主王英言請帶領頭目百餘人給令牌令旗往勘夷聞其聲勢久無一人復出者汪至開原更有子所招出兀者前衛野人女直堵里吉等三百餘人而予時在撫順所邀予予亦馳至開原與汪會汪曰若之何予曰太監既至此此夷卽太監招出者也何間彼此汪揣知事不易遂聽予言俱犒之既又以膽黃璽書付各寨招安卽以事聞已而汪意猶欲再招出見示己功予曰太監比來既有令牌令旗彼懼決無敢出者太監第回京可保無虞也汪亦欣然與予俱歸遼陽復會聞于上予至京師上賜羊酒寶鈔汪亦釋然矣既而兵部以失機召信斌入京久未訊汪皆與復舊任適汪有事河南兵部以信等逮訊于都察院汪回怒甚又兵科給事中李謙者素通斌乃上疏救斌汪遂請同定西侯蔣琬刑部尚書林聰往勘蔣與林曲意奉承無不至陳由是遂得大造譖言汪怒予益不可解陳譖既行乃搃予賞犒夷人榜

責軍將疏授汪汪遂密奏予下錦衣獄謫戍于四川成化癸卯乃蒙恩改都察院副都御史巡東嗟乎國計私忿不兩立也予以區區爲國之心雖一時艱危何恤然而事久天定不惟少裨于邊防國事抑且不愧不作神明有不扶持者哉

又曰兵欲勝敵謀貴素定而戰勝可必故孫子曰多算勝少算不勝矧用兵有節有勢善用兵者必審其節勢若士卒奮勇勢如湍水之漂石主將用兵節如驚鳥之擊物則敵豈有不敗而我豈能不勝乎今各邊大小將官平時不講韜略不習兵事遇小寇之入或邀其歸路而得其一二或出境掩襲而殺其數級虛張賊勢本三五十騎而報作四五百騎本一二百騎而報作千騎所管上司不察虛實輒以代奏濫冒陞賞及遇大敵則嬰城自守而一籌莫展去冬大同西路如姚信等是也此等將官終誤邊事而啓禍源況今虜賊譎詐善于用兵若不預畫妙策廣集衆兵乘其機會使彼大遭挫衄豈肯輕易遠遁而不重擾我邊擾之既久必謀南侵國家之患何時已乎且宣府延綏邊防頗固軍馬頗

勁未敢入犯惟大同地勢平漫斥埃稀疎加以軍馬未精恐此虜今春過河仍復侵犯邊方安危在此一舉以臣等度之若數路軍兵俱集中路每日練習遇賊入境每以遊騎兵三千爲一陣可分六陣每老家兵亦可分三陣爲犄角之勢每陣勢相去數百步賊若擁衆而來必分兵拒我彼賊旣分其勢必寡奮勇大擊彼必遭挫彼若併勢攻我我之別陣速來應援彼必不能相顧賊走而遁矣又恐虜請詐聲東寇西或露其形似犯我之西路我兵不知俱聚于西彼卻藏形擁衆向東東路無兵以禦彼必得利此尤不可不深爲之慮須平昔每路揀選十分有膽氣乖覺夜不收數十人給與上等善能馳驟好馬月支料豆一石常令遠出探賊知其所在隨時聚兵藏形以待庶不墮其奸計此則勝虜大略其臨時相度賊勢出奇制勝又在總制總兵各將官調度施設如何耳若曰我寡彼衆終不與戰則此虜何時可破合無勅兵部通行聽征總督總兵等官并各邊大小將官知會斟酌而行務使虜賊遭挫地方永寧然克敵致勝固在乎精兵所向無前尤在乎選鋒故孫子曰兵無

選鋒曰北北卽敗也是知兵不選鋒取敗無疑今大同宣府延綏官軍雖有遊騎奇兵之選終是強弱相混凡遇大敵多不能支去冬姚信等遇虜不敢與戰亦可以驗况追求官軍遇敵殺死賊人往往爭奪首級不肯追賊得以遁去甚有反被賊兵所襲而大敗者此誠各邊大弊合無兵部行移聽征總兵官朱暉等并各邊大小將官所領官軍務要仔細逐一試驗揀選十分驍勇精銳者三百員名爲前鋒仍每官弓箭手若干名長牌手若干名神鎗手若干名長鎗手若干名每五十人爲一隊十人爲一伍內選一人爲伍長再選十頭目爲管隊記簿在官其馬匹亦選上等等者給與凡遇賊人令當前鋒若能敗賊齊力追殺不許先斬首級收兵之後公同割取就于前鋒官軍內審係其所殺照例報功如此庶人多奮發且絕冒功之費矣

尹耕曰我國初之經略邊鎮也以宣大偏頭爲極邊故宣大置總兵偏頭置副總兵所以重之也以鴈門寧武井陘爲內邊故但設守備所守備官視彼爲少緩焉寧武之數擾則大同之失守爲之也而乃移偏頭

之兵將于寧武斯不爲全算矣嗚呼京東之外鎮營薊遼陽也京西之外鎮宣大偏頭也京東之內險居庸白羊紫荆倒馬鴈門寧武井陘龍泉也外鎮以屯重兵進與之戰內邊以嚴隘塞退爲我守斯其畫一之論乎

劉鳳曰太祖因天廚入紫微而有邊寇之敕成祖因金星出昴北而有加慎之諭蓋二祖之備胡每以天象爲占其留意周密如此今邊將豈有能知天文者乎

嘉靖三年七月大司馬金獻民疏曰虜衆二萬俱已入套亦不刺盤據于西抱兒孫窺伺于東卽今秋高正出沒之時查照舊規于宣府大同山西鴈門等關陝西甘肅延綏寧夏薊州遼東諸鎮務戮力同心操兵秣馬修築城堡濬治濠塹整備器械馬匹以候請敕九道上悉從之

蔡公時鼎曰邊事無全得亦無全失和戎之利著于春秋謂其盡是者固非爲其爲盡非者亦非但當平日預養將士毋使推轂之任撓于權倖荷戈之後困于侵削則守戰之備積久自修今北虜久和將無從戎



之重可鑽謀而授卒無致命之危可漁獵而使故至簡用之權兵部不得專督臣不得主撫按不得覈貴近狐鼠視爲利窟當事者力不能禁已失職矣又從而求結內援爲之先容請托門下專得邊臣重貨陰爲營幹匿其多者而白其少者以示不隱以致各邊裨將而下剝下授上者必速効務實修備者必鮮功夫賞罰之柄莫過進退功賞一失衆心解體故所謂不在邊境而在朝廷雖云常談實切至理臣方在邊時有慷慨之將含涕見語曰我日夜苦心誰能知者環視債帥朝謀夕轉耳余聞此言常爲扼腕痛心思邊事敗壞必此之由且邊臣禦虜畏狗者可幸旦夕無事抑制者或有激虜之禍廟堂之上旣欲偷安目前不能忍一時之變邊陲之下孰肯以身當禍爲國家任後日之咎且抑制者禍速而小又未必然畏狗者禍遲而大卽今日旣及見矣乃不重責乎弛備苟且安者而惟于生事是問何示怯也是以虜日驕而我日弱弊又坐此夫平日不能擇將養士隨事防遏一旦虜人翻覆欲戰則無兵欲守則無備遂乃倉皇失措姑務容養將來之禍倘不可支釁患之罪

豈得獨諉于下乎

□□□曰易稱王公設險以守其國傳云天子有道守在四夷至哉言乎周固封疆備邊境完要塞謹關梁塞豁徑扼走集而掌固司險舉不廢職迨其季世冠帶之國七燕趙秦邊胡始築長城拒守秦并六合起臨洮邊東餘萬里又渡河取高關陶山北假築亭障是後世驅胡資漢築朔方唐塹五原靈武東漢宅雉已失全險宋捐燕雲卒焉斬祚我太祖高皇帝迅掃胡元妥懽既窺愛猷再遁文皇帝三駕虜庭阿魯台奉款然而邊防之制視古特加焉高皇帝既定天下卽元故都設北平都司文皇帝因奠鼎爲今都辰山負海固擬于嶠幽本太行鴈門諸山塞垣連絡險由天造居庸東折玉帶神領若抱若拱九陵在焉故居庸爲京師北門隸昌平平密邇薊州薊昌俱畿內要地故未稱鎮薊之稱鎮自庚申皆嘉靖中虜警時所建置者也國初設大寧都司營州等衛與遼宣東西並峙爲外邊又起古北口至山海關增修險隘爲內邊永樂間以兀良哈扈靖難功畀以大寧白雲紅螺地東起廣前屯歷嘉峰近宣

府爲朵顏自黃泥窪逾瀋陽鐵嶺至開原爲福餘由錦義度遼至白雲山爲大寧號三衛徙大寧都司于保定散興營諸衛于畿甸循居庸左轉爲漁陽盧龍當山海之際古渝關也控遏遼左爲遼鎮遼東孤懸千里三面瀕夷一面阻海特山海關一線路內通前代皆郡縣我朝盡改置衛獨于遼陽開原設安樂自在二州處內附夷人其外附者東北則建州毛憐女直等衛西北則朵顏福餘秦寧三衛右轉循太行西南包平原沃野帶絡數十城爲古燕趙郊而宣府大同握重兵鎮焉宣府漢上谷大同漢雲中也國初設衛開原東接大寧西聯獨石而開平興和萬全爲要地後大寧畀虜興和亦廢開平孤立難守宣德中徙鎮獨石宣府稱重鎮云大同平川曠野黃沙白草虜患特重西則平虜威遠中則右衛守口皆虜南犯朔應諸城必窺之路東則天城陽和爲虜入順聖諸處之衝而平虜西連屯營堡與偏關近虜纔出套便涉其境故大同稱難守居庸西舊松林數百里間道騎行可一人卽元札八兒導胡兵南牧處也柴荆倒馬二關扼焉而重兵鎮保定扈京師又右轉爲雁

門寧武偏頭三關隸山西東起代郡外斷雲中內經太原北境西盡雍河之濱而雁門稱絕險自偏頭踰河稍南爲陝西陝有三邊四鎮榆林舊治綏德守在東勝東勝者卽唐張仁愿所築三受降城也在河北正統間失東勝退守黃河後以虜入套內又棄河守牆成化中徙鎮榆林堡地險兵強人呼爲橐駝城塹自黃甫川西至定邊營亘千二百餘里聯墩勾堡橫截套口稱雄鎮西絡寧夏固原二鎮寧夏西北倚賀蘭山東南帶黃河內有漢唐二渠險固饒沃成化以前虜患多在河西自虜入套河東三百里皆設備邈年修治牆塹正德及嘉靖年間增築內外邊而清水與武花馬池各營尤稱要害固原在寧夏南前套虜未熾獨靖虜一面備胡韋固安會之區號爲無事自火篩入寇後遂當虜衝始卽州治爲鎮城以固靖甘蘭四衛隸之東顧榆林西顧甘肅與寧夏相爲唇齒近又于本鎮迤西增鎮臨洮專制西陲半壁隸以蘭河洮岷階文而表裏聲援不至長筵難及矣其自賀蘭山西至鎮番又西極甘肅皆古朔方甘肅卽漢之河西四郡武帝所置以斷匈奴右臂者也洪武

五年下河西棄燉煌畫嘉峪關爲限由莊浪迤南三百餘里爲湟中地  
今置西寧衛由涼州迤北二百餘里爲姑臧地今置鎮番衛又設甘州  
五衛于張掖肅州衛于酒泉蘭州衛于金城全鎮之地幾二千里列鎮  
河外薄于砂磧而肅州西七十里爲嘉峪關西遮西域南蔽羌戎北捍  
胡虜尤稱孤懸此皆自京師右轉而循西以爲徼者也九邊形勢大略  
可見于此矣

□□□曰蓋嘗合九邊大勢觀之甘涼榆寧與吉酋鄰雖世受我爵賞  
然毛目天倉之險彼實據焉寇已迫于門庭宣大山西與俺酋鄰雖世  
稱我藩籬然九十九泉之勝一十二哨之衆彼實握焉患恐貽于養虎  
矧老把都那林台吉生齒羣幕環布蟠結是我肩脊之憂也莽刺之有  
穴落赤等憂在洮河海上之有打兒汗虎喇哈赤憂在遼東黃河套之  
有丙兔着力兔失喇啞叭大諸酋憂在嘉峪關夫夕顏罕一酋耳後嗣  
蕃衍流金七輩生息四百有奇其三衛屬夷併各邊夷番又不知其凡  
幾矣史車負恩六凶熾虐則前事之明鑒也往議者曰復大寧復河套

復故遼陽夫自大寧都司內徙遼東折右臂宣府折左臂聲援隔絕松  
關橫水勢固在虜龍岡濛河我失其險王畿近地豈容盜賊居近議欲  
比擬唐受降宋大順而築彼露靈之山以爲吾守此一策也套內廣饒  
有鹽池海子葭州民往多種食其塙地自舍受降而東勝已失一面之  
險又輟東勝而延綏則以一面之地遮千里之衝遂使套中沃壤爲虜  
巢穴而寧夏外險反備南河誠復守東勝因河爲固使套地方千里歸  
我耕牧得屯田數百萬用省內運亦一計也遼陽故城在三岔河南北  
亘數百里草木豐茂更饒魚鮮自洪武壬子委以與虜乃遂進據腹心  
限隔東西守望勞費道里紆遠遼人每憤憤焉昔我太祖嘗論遼帥曰  
滄海之東遼爲首疆誠重之也則今奈何使之淪于虜也雖然此三者  
猶其標也語曰殺虎易奪虎子難奪虎子易奪虎穴而居難今未能殺  
虎遽欲奪其子處其穴乎兵法曰知彼知己百戰不殆而膠柱鼓瑟恐  
非萬全計也

□□□曰今九邊兵馬視國初稍減矣韃靼酋長視國初倍蓰矣漢儒

謂匈奴之衆不過當一大縣以之借箸而籌今虜不亦謬乎嗟嗟疇昔兵將如雲之盛元孽如綫之衰猶不能以長纓繫虜王頭致之闕下茲以有限之兵當無窮之虜必欲剪滅此而後朝食非眞見虜在吾目中而又廟堂之經畫素定甲兵素精邊儲富饒餽餉不絕其何能濟前俺答受封時廷臣皆謂虜時內訌應接不暇卽有修爲隨經殘破今虜旣効順國家無事宜乘此時積我錢穀修我險隘練我甲兵墾我屯田理我鹽法今已三十餘禩矣錢穀何如險隘何如甲兵屯鹽又何如視此情形曾不若曩時釋之爲外懼也

□□□日總督巡撫提重兵于境上生殺在于手大將軍援袍鼓立轅門分巡參遊各專一面然而名譽之人未必諳輶鈴介冑之士未必閑方略御命而往草草卒事巧營遷轉猝然有警東支西吾狼顧錯謬誰爲朝廷出死命斬將擧旗卽有之又動遭掣肘文臣權撓于中制武吏銳挫于調遣舊例邊臣奏請限五日內具覆今輒逾數月不得報請兵請糧慘于乞哀議撫議勦迄無成畫甚至瑕類稍見桂後惠文譁然弄

其筆舌疑慮約結有奇安施古者將在外君命有所不受今文士畸重武弁畸輕名列縉紳者持其文墨論議多于封疆之臣無論參遊卽總兵至倨撫也督撫巡撫咸得司彈壓賊至調度督撫檄之東巡撫檄之西或機當戰檄之守機當守檄之戰機當預布堵截于前檄之合力勦捕于後報上兵部兵部題請兵科亦題請或兵已東而調之西或兵旣西而調之東偶一失利廷議紛紛救過不贍浸以解體且今之任將者與古異古者或出于薄織椎埋或出于奴囚隸卒今也不然督撫非循資不以遷總副非都指揮不以任嗟夫假令人而可以資格拘也則曹劇何以鄙肉食秦三帥祇以繫鼓淮陰袴下可以不登壇然古今人用之或以強或以霸或以帝左驗明也請自今但論賢否不論官階督撫缺內自科道部屬而上及參將簡任寬以文法假以便宜久其責任豐其祿入毋從中制毋輕調遣有功卽與紀錄功多者增秩且錫之蔭非汙穢不職喪師失律者言官毋得妄糾彈如是則人爭奮其忠勇智謀死綏死鼓期獲首級成報天子所噫昔馬文升經略哈密黑麻悔罪余



卷之五十二

子俊鎮守榆林虜人嚙指項忠單騎抵賊滿四就擒許進領鎮大同瓦刺入貢薛祿佩將印巡邊圍斬虜奇黃郭登設攪地龍飛天網陷賊朔北今誠得若人任之無虞虜矣

申文定公曰自古當事之臣未有臨事倉忙而能有所幹濟者亦未有輕開邊釁而不誤人國家者故愚聞之見謂一隅有警則就一隅應之一隅不靖則就一隅圖之苟處置得宜擾攘自定若以一隅之患騷動九邊以一隅之信狂橫抵牾部未見其得策也

許論曰夫陝西遼遠三邊而建列鎮以守之曰延綏曰寧夏曰甘肅曰固原是以鎮東由黃甫川以至于定邊營一千二百里定邊營乃西接寧夏花馬池由花馬池以致于橫城三百二十里橫城亦寧夏之堡而達諸黃甫川共一千五百二十里皆在黃河之內邊牆外悉爲河套矣套長幾二千里橫牆距河遠者八九百里乃六七百里近者二三百里餘惟黃甫川八九里耳川南焦家坪兩岸夾山先合後泮及娘娘灘羊圈子渡口交冬水涸故胡虜每二三年或四五年大舉自坪或灘或渡

口以入套馳而蹂躪焉害斯延矣又每遣零騎三四千或六七千伏林  
逐草住牧不絕也是以套中之虜無歲無之由橫城渡河而西是爲鎮  
城由鎮城之鎮遠關二百四十里中衛四百里是在黃河之外賀蘭山  
紆餘而遶之山之後虜時住牧警屢至焉又由鎮城渡河而東則入靈  
州以至于韋州三百四十里韋州南接固原預望城以至于固原鎮城  
三百里由固原出靖虜蘭州七百三十里河州九百二十里是又皆在  
黃河之內往往套中之虜秋由花馬池湏牆而入山後之虜冬由靖虜  
衛踏冰而入則臨鞏涼慶諸郡縣皆繹騷矣由蘭州渡河西出莊浪以  
至于甘肅鎮城一千二百里又至于肅州嘉峪關六百里共一千八百  
里又皆在黃河之外西海刺刺山江零口有虜寇土魯番天方西域有  
回夷西寧莊浪華哱章哱等族有番落然則酒泉浩疊之間環而居者  
孰非犬羊之穴乎况山後之虜由蘆塘松山而入者又數數然也是故  
延綏鎮一千二百里寧夏鎮一千二百里甘肅鎮一千八百里共五千  
六百里魏乎遐矣古之言兵者曰地利曰地機又曰知戰之地者可千

里而會戰先是四鎮有圖可閱但緣邊地勢本長亘而括之以方相聯而乃折之是以觀者或病耳比因軍興督戰出入塞域卽其所至而按堵之所未至者則詢于將官什五乃總衍爲圖疆場比次延袤不絕凡營堡疎密斥堠遠近城塹高深山谷險易道路迂直與河之內外山之前後境之東西及虜所往來出沒之衝罔不俱載庶幾籌邊君子揆敘形勢申固封守有所考焉且倅元戎甲士于是乎揣山川沮澤之形計險扼遠近之利執通掛交阻之機或畫地而屯守或處高而待敵或塞隘而遏突或衝隙而破圍或倍道而輒戰或馳間而掩擊或迂途而至誘或夾阜而張奇或依谷而設伏凡所以據險峻防患審勢計勝以扼彼虜之吭咎其背斷其左臂而制其命者哲然而不迷矣禮職方氏掌圖辨物周其利害况邊服利害而不可知乎此圖之不可以已也

往行

三關

前言

魏煥曰偏頭寧武鴈門自西迤東三關並列西盡黃河東岸東抵大同西路雖太原北境要害之地與真定相爲唇齒非惟山西重鎮而畿輔之地安危係焉况達官達舍多安置真保河間等府子孫世受國恩臣服効力固無他志但同本源性習尙在勢終與合故三關疆域所係匪輕與宣大並稱重鎮

黃河東北舊有東勝城與大同大邊興和開平相聯通爲一邊外狹內寬復設偏頭寧武鴈門三關十八隘口于內以爲重險往年東勝開平能守三關未爲要害正統以來東勝開平俱失三關獨當其衝特無住牧之虞防守尙易弘治十四年以後虜住套中地勢平漫偏頭關逼近黃河焦家坪娘娘灘羊圈子地方皆套虜渡口往來蹂踐歲無虛日保障爲難今三關要害雖同偏頭尤急十八隘口雖同胡峪口陽方口石硤口尤急河岸渡口雖同娘娘灘太子灘尤急先年以山東西巡撫住劄鴈門關內代州總兵住劄鴈門關內代州總兵住劄偏頭關又各設守備一員以備調度嘉靖十九年胡虜充斥三關不能禦近議于朔代

之間設重臣一員總督宣大三關亦如陝西固原之制

又按三關東十八隘口又東紫荊關又東居庸關山勢連亘實天設之險爲京師近藩往近紫荊居庸三關可踰而今不可踰者以其增築修鑿之工多而具險備也使今之三關亦如紫荊居庸胡馬敢深入乎故今之急務惟在備三關之險擇將帥覓壯勇積芻糧以整深入之門戶庶山西定而畿輔之地無警矣

北虜亦克罕一部常住牧此邊兵約五萬爲營者五曰好城察罕兒曰克失旦曰卜爾報東營曰阿兒營曰把卽郎阿兒入寇無常近年虜在套中以三關爲出入之路直抵山西地方搶掠嘉靖十九年秋虜酋吉囊擁衆數萬由偏頭等關入寇太原大掠居民而出零賊亦爲鄉兵所殲嘉靖二十年秋前虜復由本關直抵平定州參將某甲被害居民殺擄者無數山西自來被逆虜之慘未有過于此矣

嘉靖二十年五月該兵部題該巡按御史譚學題訪得虜酋俺答阿不孩等盤據河東日以秣馬孺鋒爲事往往問訊關中去來諸路殆無時

忘情侵寇去年七月分投肆犯諸邊金帛子女滿載歸途狼貪易熾虎噬難窮十二月復由原路前至朔州等處仍要犯山西及保定等地方以隆冬冰滑不能扳援而去今春二月又在沿邊住牧方由大同右衛平虜衛二邊拆牆而入撫鎮等官卽行堵截屢犯屢挫不得驅攘禍機隱伏宜先預防其要在于添設大臣一員竊惟政在得人權貴專一宣大偏關勢猶唇齒義關休戚然一遇有警因地方兵馬單弱而各分彼此不肯應援縱肯應援亦多觀望未有關志往往挫失機宜要如陝西例添設大臣一員居中調度若臂使指則威權旣專廢墜自舉查得先年固嘗屢設事寧旋即收回是以人無固志政罕責成宜念三鎮密邇京師敕下廷臣會議推選諸練邊事大臣一員前來三鎮適中去處開府專一總督宣大偏保一應軍務

成化十一年總督余子俊同鎮守等官親詣小邊地方芍藥坡極高頂上東西遠望多係聯絡高山當議得西自偏頭關起歷大同抵宣府俱係億萬年拱護京師切近藩籬照依延綏事體修創墩臺壕牆等項庶

幾邊方得有保障所在軍民耕田鑿井各遂安養從地名兔毛河沿小邊直抵偏頭關相度山勢從宜定擬應修墩處修墩應削山處削山有水口處修水口務期他日興工直欲收從省之功後親自踏勘得偏關小邊東西長七十里該周墩四十二座擺合要害見有墩二十五座處修墩一十七座每墩神鎗手五人神炮手四人夜不收一人各披戴盔甲腰刀弓箭先將墩自東而西編成字號每號置牌一面開列人名器具于上每墩精選步隊管隊官一員管鎖每二十墩用指揮一員每月一換瞭望哨探如是小寇相機截殺若係大舉堅壁清野加謹隄防仍要星馳飛報前去凡通賊要害路口每東西相去十里或十五里或二十里去處計量賊衆可以擺陣馳驟者卽挑可容三千人馬營盤一處若是只可單騎或並騎經行者卽挑可容二千人馬營盤一處周圍俱濠闊一丈深一丈藉彼爲截殺以逸待勞之所此等營盤挑成後有賊過未免懷疑多見遠避地土旣不妨人春種緩急又可以爲固

叢蘭曰竊照紫荆倒馬龍泉三關內護京畿外鄰邊塞俱爲重地而紫

荆關逼近大同宣府尤爲緊要臣初到本關之時出城閱視形勝看得本關北門外大河一道闊二十七八餘丈名曰拒馬自山西廣蜀而來經浮圖峪城西北及本關北門出乾河口入腹裏易州涑水縣地方北河北岸地名石嶺直抵北山三里有餘內有大路數條可通奇河峯峯東峪官座等口亦至易州涑水縣地方夫水陸之道俱不經由本關經由腹裏雖有此關其與無有何異又況此地平漫高亢賊若據此俯視本關城內虛實強弱一覽無遺爲兵家所忌訪得正統十四年虜賊犯順彼時本關守臣阮太監孫都御史韓指揮等官俱被害見有祠堂在于前地及眞定等處地方蹂躪剽掠其慘尤甚究其所以皆由此入至今人言無不寒慄臣遵照敕內事理嚴督守備等官設法整理間查得弘治十二年該巡撫保定六府兼提督紫荆等關右副都御史高銓勘得本關河北岸前項地方相應添設堡城一座堡城後至北山添稍牆一道已經具題該兵部題奉欽依行令覆勘節該巡撫經略官及內外守備把總千百戶年老有識軍人各諸前地相勘相應添設等因回奏



又經該部覆題欽准修築今已四五餘年未曾整理臣恐事有不測難以防禦隨委本關守備官杜雄督併官軍舍餘照依先原計丈尺已于六月十二日興工修築外但河流處所空缺數多人馬尤可通行晝夜思維計無所出又行督同守備等官議得新堡舊城近河又添接城垣一道臨岸擇取水不能犯處所各立敵臺一座上起敵樓三間兩面對峙每臺并樓上可容百餘人滾木疊石等項器具堆積于內中流處所又添連環木柵二層兩頭具用木椿砌入石牆中間止露鐵環木柵木椿牽連一處水泛之時卸于阜高去處水小之時仍舊布列于內萬一賊虜衝突我軍據此敵臺矢石並下兩相夾擊中有連環木柵水不得衝決馬不得以馳驟庶幾可保無虞反照本關迤西七十里浮圖峪口又爲此關咽喉之地其城西北亦被此河界破其險無可攔截胡馬先年巡撫官曾費數萬銀兩騎河樓砌石橋一座上起橋樓三間儘可保障但山水暴發奔潰洶湧推石拔木俱擁于此以故朝焉告成暮卽蕩然後又有經略官亦用大松柏等木乃于中流橫立木橋十層每層立

四十根每根要鐵釘數十餘條亦可保障不久仍被此水衝去至今突缺無法可治數年以來仰仗天威邊塵不起所以無虞萬一此輩覘知突然而來不知何以禦之臣督同守備官王京委官知縣吳堂再四相視今次若再照前立橋立樁徒費工力終不能久亦照紫金關規模仍于東河岸擇取高處添設敵臺一座上起樓臺三間臺後設築城垣一道兩面俱用垛口接連舊城河西逼近西山就將山麓鑿平亦立敵臺一座上起敵樓三間下半截剗石爲梯先是亦各堆積疊石滾木等物在上中流亦立連環木柵二層一遇有警分令我軍該東岸者自本城內入新城而登東樓該西岸者先登樓內抽梯于上各用矢石滾木等物以高臨下互相夾擊虜賊雖衆自何而入本處官軍人等無不以爲經久有益以此各處隘口但係幾年水衝誠不可恃他處亦多類此仍以于城垣兩頭擇取我軍可登彼不能到路必經由其下高險地方添築敵臺等項今臣自龍泉關覆閱至此前項工程十八九可完除通行完日另具丈尺數以備細造冊奏報

王瓊曰所謂高關者其山中斷兩岸若闕焉今之邊關皆是萬山綿亘之間忽然中斷可以往來故歷代設爲重城屯士卒以戍守之所以絕華夷之通使外之賊寇不得入而內之奸細不得出也按史高關者在古朔方臨戎縣北連山中斷兩峰俱峻若城闕焉朔方古夏州是也今地在黃河套中世不知其所在就以今日邊關言之其最大而要者居庸紫荆松亭鴈門是也前代關隘之設皆爲守邊惟今邊關則咫尺神京之側非但守邊也蓋開關之初天造地設此連亘之山以爲華夷之限而又遣巨靈擘開兩山以通出入蓋于億萬載之前豫有待乎我朝開國于億萬載之下自古都于燕者前有召公奭後有金元然金元夷狄也烏足以當此山川之王氣哉王氣之隆正有在乎今日雖然漢人繼秦之後則以秦爲鑒唐人繼隋之後則以隋爲鑒彼秦與隋豈漢唐所可匹哉而以爲鑒者警戒生于不足臣嘗觀元人進金史之表曰勁卒擣居庸關北拊其背大軍出紫荆口南搯其吭此古今都燕者防患之明鑒也然擣居庸而謂之拊背出紫荆而謂之搯吭則立言之間輕

重緩急不問可知蓋背乃人身之所倚負而吭則呼吸飲食所必經死生之係也况今六軍億兆聚于京師北倚居庸卽爲重鎮紫荆乃南出之路疾騎抵吾運道數日可到是尤不可不加之意焉議者往往急居庸而後紫荆此不知大勢者之言也

往行

### 三衛

訂言

魏煥曰朵顏三衛在外邊之內內邊之外元兀良哈之地古會州也東西千里南北倍之洪武二十一年元裔東西夷遼王會寧王朵顏元帥府元帥各差人來朝永樂詔以其地置泰寧朵顏福餘三衛每衛建都督二朵顏衛左都督花當今襲者曰革蘭台右都督朵兒干今襲者曰拾林李羅泰寧都督二今止一人曰把班福寧都督二今無止都指揮一曰打都三衛惟朵顏日衆朵顏惟花當日衆把班打都拾林李羅皆爲彼制馭今考革蘭台子孫爲都指揮者二曰脫力曰哈哈赤爲正千

戶者四曰革李來曰幹惟曰把兒都曰百哈爲舍人者曰打哈等最多每歲朝貢二次共六百人惟幹兒古道兒撒只兒他魯渾脫桶阿土魯罕脫桶阿克庫把禿刺大同脫脫罕等諸夷俱在牆子嶺古北口白馬關以西至黃花鎮境外住牧專肆搶掠自不朝貢邊人爲革蘭台把班革李來打哈脫可諸酋狡譎而打哈之子尙李來尤猛悍同類畏之生齒日繁衣食不給乍臣乍叛爲我邊患恐與北虜連合勢難阻禦防守之計不可一日不講也

又曰分東胡爲衛三百有奇自都督以下歲一入貢論其功而陞賞之方其入貢也守土之臣驗之而入無敢留難焉比其賞賚之加恆饗其所欲其私相貿易者率寬假之故諸夷恆求貢而其購在我今也不然其來也守邊者索之索之不足而恐詈之其入京也譯者之害如邊臣比其賞賚之錫又不足以償其所欲而凡陳乞陞級譯者悉爲張主其所欺取猶無厭而可惡所司若部悉因其言以低昂也賂彰威損侮孰甚焉此其故諸夷率易中國而無心于貢無心于貢而後撫諭之說行

有撫諭之說則其購在彼矣夫使諸夷以入貢爲購中國之威安在哉夫驗貢以勅爲準也今之勅皆私相貨市非其人之子姓也矣違之則失在我從之則大羊之貪無厭而其漸愈熾故其先當求邊臣之有心計威重者悉召諸胡而諭之核其真僞而折服之限以年而更易其勅凡入貢之數悉準如制其應陞之功邊臣狀上撫按撫按以其狀上之朝廷使司譯者無所與而其賞賚之給貿易之通如先朝之厚且信焉則庶幾服其心矣若因循撫諭而苟且將就是何異于養蠱待弊也哉

又曰兀良哈三衛見薊邊鎮下自寧前抵喜峯口近宣府曰朵顏自錦義歷廣寧至遼河曰大寧由泥凹逾瀋陽鐵嶺至開原曰福餘其俗喜偷常入北漠盜馬匹三人驅數百十匹善剽掠卽殺人寇抄髡其髮以自標性貪黠邊人以酒若貨啗之執而殺之茲故報復抄虜無寧時一遭剽劫數十年不入其地遼邊各夷惟此是最無賴也

又曰國初分東胡爲衛三百有奇兀良哈三衛各置都督二驍廉撫馭最上策也分其部落則其弱易以制別其種類則其間易以投使之人

自爲雄各相爲戰所謂夷狄相攻中國之利也而又爲之虛級自都督以及所鎮撫在女直一歲一貢在三衛一歲二貢使之歆戴中國外馭北虜也

又曰朝貢夷人賞賜都督段絹六表裏都督指揮至鎮撫五表裏舍人四表裏散達一表裏所貢馬牧于本鎮行時工部給價每匹六兩女真一年一貢每貢一千人三衛一年二貢每貢三百人二項夷人每年來貢者一千六百其宴賞之費驛迎之擾可知矣

又曰永樂置立三衛令其每年朝貢二次每次每衛各百人往來互市永爲藩籬遼東宣府自此隔涉聲勢援絕矣正統以前夷心畏服地方寧謐但令都指揮或都督于喜峯口密雲等處鎮守驗放別無多官後土木之變頗聞三衛爲也先嚮導乃命都御史鄒來學經略之此後因而添設太監參將等官而夷情亦變詐不同然尚未敢顯言爲寇也弘治中守臣楊友張瓊因燒荒掩殺無辜邊釁遂起正德以來部落旣蕃朵顏獨盛陽順陰逆累肆侵噬花當則臨求添貢把兒孫深入虜掠動

稱結親迤北恐嚇邊方參將陳乾魏祥俱以重兵前後陷沒他可知矣故三衛夷情難與往日例論禍機所伏不待智者而知黃花鎮擁護陵寢京師後門今兵多逃亡止餘二百河間等衛之戍空名無實單弱極矣議者謂更當增戍而關外田夫可募爲兵此一策也自古北口潮河川俱稱要害而潮河川殘元避暑故道尤爲虜衝作橋則浮沙難立爲塹則漲水易淤都御史洪鐘雖曾設有關城勢難孤守今須每川大建石墩數十令其錯綜宛轉不礙水路庶幾可以久乎喜峯口三衛入貢之路撫賞諸費久累軍丁近聞取諸馬場子粒似矣建昌營自裁革內臣之後以其兵多于燕何營巧復添設遊擊甚爲紕繆夫遊擊之名謂居中乘便兩面馳擊也今偏在東隅其謂之何矧東去燕何營參將止五十里西去太平寨參將止六十里不爲贅員且掣肘乎愚嘗謂薊鎮在今當重其事權總兵須與掛印同巡撫駐薊州遊擊駐三屯營若燕河馬蘭密雲三參將則仍舊而以太平寨并入建昌爲一參將則庶乎關統正而緩急有濟矣且設關于外所以防守立營于內所以應援今



體營提調既分爲二則關獨當其害營但肆爲觀望耳假令營之提調卽司所直之關責有攸歸其復將誰諉又本鎮額兵原少隘口甚多除分戍之外消耗之餘所在單弱言之寒心是故存留京操之士益募土著之兵設險修關嚴烽遠譟選將練兵足食明法曲突徙薪之計不可一日不講求也

王公瓊曰兵部題照得朵顏福餘泰寧三衛夷人自我太宗文皇帝安插在他授官降印蓄爲藩籬百餘年來堅守臣節未聞悖逆自去歲以來姦夷造爲小王子結親之說敢爲要求之計守臣輕信張大其事遂致本夷肆志先要我以添貢朝廷俯念夷情艱難暫從其請曾令大通事諭以禍福令其効爾祖父恪守臣節毋起歹心若倚北虜和親要求無厭必調大兵痛加征勦掃除巢穴不許住牧又曾候其來朝令禮兵二部堂上官督同大通事于禮部衙門明白宣諭後該朵顏衛都督花當奏本衛所鎮撫失林字羅不必赴京就彼承襲祖職事守官又曲爲奏請准寫勅命一道交與薊州鎮巡官親付拾林字羅收領今年二月

禮部手本開稱譯出朵顏衛都督頭目花當奏稱迤北達子伊並不知東西二處達子已省諭了並不作歹今巡撫都御史王倬奏稱射死參將陳乾等係花當男把兒孫等帶達賊拆牆入境係是花當等外示效順中懷悖逆以要求爲得計以犯邊爲長策參將陳乾之死輕率寡謀雖其自取奉勅將官殞命于臣服小夷所損甚大況事當謹微漸不可長若復因循姑息置之不問誠恐祖宗御夷法度自此陵替且以後三衛夷人難以處待合無請勅薊州鎮巡官從長計議選差通事并有智識官員前去近邊地方拘喚花當等責問朝廷旣節次施恩撫待汝夷因何面是背非外順內逆陰從爾子把兒孫領人到馬蘭谷搶掠射死參將陳乾如果花當不知就令花當將把兒孫捉拿解京或令自行處治償命姑赦其罪如或通同枉縱不問將來犯邊朝廷必要與師問罪將京營并薊州保定天津衛精健步軍選調三萬各執短兵火器分路進入犁庭掃穴再調遼東精兵二萬攻其左宣府精兵二萬攻其右汝失故巢進退無門追悔無及通將責問取過口詞會本具奏再行議處

臣等愚見如此伏乞聖明裁處等因正德十年五月二十九日本部尙書王瓊等具題六月初五日節該奉聖旨是其犯邊達賊是否花當部落鎮巡官便選差的當通事去責問明白奏來處治欽此兵部題臣等議得朵顏衛頭目花當恃其詐力敢肆侵陵外示效順中懷悖逆陰與通事程理等交接私通窺闚薊州一鎮將軍懦弱邊務廢弛遂敢捏造結親北虜之言以逞要求無厭之計一面進貢一面犯邊自去年以來侵犯邊境殺擄人民數十餘次因朝廷寬容不問以致黠虜之奸伏藏不露勢日猖獗議者不思北虜小王子瓦剌等部落世爲中國邊患去年深入墩牟今年屢犯延寧固不假朵顏等衛夷人和親而後敢犯中國亦不必自薊州一帶邊關進入而後可以內侵也薊州一帶東西二路見有食糧官軍四萬二千員名本處將官若能嚴加督率撫恤簡練紀律嚴明烽堠謹飭相機隨宜運籌畫策或設險拒守或會合策應雖不能大挫賊人之鋒亦豈自喪失我軍之氣乃計不出此方議添兵增戍臨渴掘井卒難施行今花當男把兒孫等殺死參將陳乾罪惡旣已

顯著見今擁衆分路侵犯飛報屢聞臣等先議待後發兵征勦荷蒙聖明特命都指揮桂勇率人馬操候提督侍郎陳玉并鎮守等官俱奏要調兵防禦兵科都給事中等官安金等亦奏要本部速爲議處發兵巡關御史張鰲山極言夷虜侵侮之患當以攻討爲急臣等竊聞自古禦制夷狄之道固不可貪功以啓釁亦不可怯懦以求和况今花當部落糾合犬羊之衆分路內侵而本鎮將領非人軍不用命萬一邊關失守乘勝突入禍機之發旦夕難測臣等採集羣言度量事勢當此之時命將出師聲罪致討勢不容已但兵戎重務臣等未敢擅便今將念行事宜逐一開陳聖明裁處正德十年六月十四日本部尙書王瓊等具題本月十六日奉聖旨是桂勇陞署都督僉事着統副總兵寫敕與他紀功不必差官就着巡關御史隨軍紀驗糧草戶部便查出預備毋致缺乏軍前合用銀兩准支與三千兩其餘一應事宜都依擬行欽此一桂勇欽奉上命領軍前往薊州邊關征勦叛夷其薊州邊關官軍并各處調來軍馬須聽桂勇調度節制若不重其事權止充參將前去不惟無

以威示外夷抑恐難以駕馭諸將查得桂勇先于正德八年曾充副總兵官量陞五府堂上署職照例請敕并關給符驗一道旗牌五面副前去統領京營并各處官軍征勦犯邊達賊凡用兵一應事宜悉聽桂勇運謀設策隨機應變專制而行遇有期會調發事件本邊總兵等官卽須火速依從應撥如有怠玩不理或無故抗違執拗因而失悞軍機聽桂勇指實奉聞區處都指揮以下官敢有不用命者輕則量情責罰重則以軍法處治俱照舊例施行其本處鎮巡官并提督邊務官應有本邊防禦事宜與桂勇事無相礙照舊徑自施行不許推托誤事今自出征專問朵顏衛夷人殺死參將陳乾并屢次犯邊之罪凡進兵機會須要詳審慎重計出萬全若能擒斬虜賊明正其罪或雖無擒斬之功能使虜衆畏服將把兒孫等獻出解京情願照舊入貢不爲邊患或畏服遠遁不可窮追並聽開具事由明白奏聞速行班師不可老師生費以致食盡難繼或貪功遠出致於疏虞咎有所歸

□□□日看得整飭薊州邊備都御史臧鳳等奏稱通事主簿許鳳等

審得朵顏衛都督花當男打哈等說稱我父花當同兄把兒孫我們來報有都督失林孛羅說稱屢次差人告討六百人進貢不准要收人馬往西邊作賊有父花當同兄把兒孫等攔當他了不知他如何又說我們衆達子幾時來進貢好收拾馬匹來關聽候等語許鳳等當時省諭照常于閏十二月初旬來量給酒肉鹽米布疋等物撫賞回還等因具本題知臣等竊詳朵顏達子把兒孫惟欲要求添貢造爲交通北虜之說挾制中國今年萬壽聖節乃敢不與泰寧福餘二衛齊來進貢意欲登動朝廷俯從所請及本部堅執大義奏准不許因見所謀不遂思欲來貢又恐朝廷怪責不容放入以此假以報事爲名歸罪于失林孛羅逆探虜意事雖遮飾終有悔罪效順之意係是夷狄似不足較許鳳等諭令其照常閏十二月初旬來深得撫待夷狄之體合無本部行文勸州鎮巡官將主簿許鳳序班子孟昇并魏宗淵等以禮獎勵督令用心等候如遇朵顏夷人前來進貢即便設法省諭以爲既是失林孛羅不順爾朵顏父子效順准爾照常年事例人數驗放入貢其以前失誤進貢

奏請寬宥姑免爾罪一面嚴督各該參將守備把總等官督令哨守人役比常年十分加謹隄備倘或設詐侵犯就便相機剿殺毋致有失事機聲息重大本處官軍不能禦敵星馳具奏定奪不可因其來貢懈弛邊備致有疏虞咎必有歸也

□□□曰看得右少卿舍誠等審取夷情除李兒只并鮮崑告要襲伊父職事情由另行查議具奏外其朵顏衛頭目說稱本衛都督花當次男舍人把兒孫差來因進貢外進送被擄漢人男婦張舍等二名又說午兒年又進送被擄男婦二名通共進送男婦四名口都交與總兵官都堂收了討陞大頭目職事管束本衛人民出力一節查得把兒孫爲因先次添貢後次不添屢來犯邊殺死參將陳乾等節次議奏把兒孫罪不殺中外共知去年把兒孫又來犯邊挾求入貢本部執奏不可准從以啓釁端蒙特旨准他今把兒孫因見挾求得計又令其頭目脫桶阿假以進送男婦四名口爲由討陞大頭目職事管束本衛人民若再輕准將來狼豕無厭之求有何紀極况朵顏衛部落人民自有伊父都

督花當管束把兒孫所請實有無父之心尤爲可惡合無本部行令舍誠等明白曉諭脫桶阿回去說與把兒孫爾前罪過旣已寬宥今要討大頭目職事管束本衛人民置爾父于何地如爾肯着實改過輔佐爾父花當管束所部三五年再不犯邊爾父來奏朝廷方有恩典如你不聽父教再來犯邊決不容恕其進送人口行與薊州鎮巡官查勘是實照依彼中事例量加給賞以慰其心仍諭鎮巡官以後務要恪守成規不許循情輕率額外奏求添貢示弱開啓邊釁如再故違咎必有歸

□□□曰查得朵顏等三衛自來進貢驗放夷人三百名係是舊例正德九年准添六百人後復不准遂啓殺死參將陳乾之釁正德十一年于朵顏等衛常例三百人外又准朵顏頭目花當男把兒孫三十人進貢以後守臣不能禁止將以爲常今正德十三年九月驗放夷人都御史張潤等乃能遵守舊規開明大義阻止把兒孫非禮之貢誠可嘉獎其要本部于各夷回還之日戒飭及請勅彼處鎮巡宣諭一節見今來貢夷人將回未奉有旨難便戒飭合無本部行文都御史張潤會同鎮



守官員依奉召集省諭施行但撫順夷情固在曉諭明白尤在防禦有道况犬羊夷情惟知貪利畏威非口舌所能馴服合無本部行文都御史張潤等務要運謀設策修舉邊備通達烽堠申嚴紀律一遇侵犯務使痛遭剉劓不敢近邊斯爲得策不可倚信夷人玩忽邊備尙致失事咎必有歸其省諭各夷之時雖以禮義爲主必須示以兵威庶彼知畏仍將省諭過緣由及修舉邊情方略具奏察考正德十三年十一月初二日具題奉聖旨是欽此

洪武二十二年征敗北胡來降者衆詔以兀良哈之地置泰寧朵顏福餘三衛以處之爲東北外藩命其爲指揮使指揮同知所領其部至永樂初又棄大寧北與之仰惟祖宗之意蓋欲使受國恩永爲外藩共享太平之盛也奈何近年以來佯爲效順陰蓄奸謀朝廷不計其過惟事涵容彼乃頑然不知愈無忌憚豈不有負祖宗之恩有虧藩屏之義哉然飽而忘恩固禽獸之常態惟恩威並用實朝廷之大權若今日來朝姑待之如常於前日罪逆則置而不問誠恐彼將以禮待爲等閒以掠

搶爲得計受恩不感無威可懲又况三衛夷使自入關來宣府奏報虜營遁去遼東傳報聲息漸少安知非此虜因與結構爲進退上冀朝廷之賞賜下畏有司之拘留又因以窺伺中國之虛實也爲今之計須于來朝夷使發露其奸使歸諭部落革心向化合無令通事及伴送人員督令三衛差來頭目把禿等前赴兵部聽尙書馬文升稱詔宣諭具述我祖宗賜土設衛建官之恩及彼今日數爲邊患之罪與結構迤北虜酋之情臣下奏請興師問罪朝廷曲爲寬宥不忍加誅之意當感恩思報毋蹈前非仍請勅令其齎回歸諭三衛掌衛事大頭目各悉此意務要追念祖宗敬順朝廷鈴束部落益堅藩屏之義如能感恩悔過許令叩關來謝朝廷遣大臣并大通事一員前來會同彼處鎮巡官省諭情勞以嘉其納款之誠若執迷不悛仍前作歹朝廷調動大軍勦殺必不輕貸區區小臣豈敢好爲此多言哉蓋以先王之制荒服有不供之職則有威讓之令與文告之辭今日之事正欲恩威播于辭令中使彼虜夷之受恩當感而有威可懲也

卷之五十二

兀良哈本春秋時山戎地秦爲遼西郡北境漢爲奚酋所據東漢征敗之走匿松漢間後魏之先復居于此號庫莫奚服屬契丹元爲大寧路北境今日鮮卑奚契丹等種不一今則不服識別以所居觀之其種與今衛有以福餘名者古之扶餘國在玄菟北千里是其遺種不可曉也永樂初棄大寧北與之今其地密邇京師歲朝貢不絕用爲藩屏夫彼雖內附日久然終是夷類往往隨盛衰以爲向背朝廷羈縻之固已臣服然所以區處之者不可不以其道賜予之者不可不以其節竊聞景泰初三衛爲虜所驅竄各虜中隨之來貢我所以待之者比其常例加優數倍彼乃憤然謂我畏強而慢弱遂堅從彼之心噫此乃陳平用草具楚使之計我乃襲而用之不自覺也其後建州董山亦以宴賞厚薄之故而叛請自今以後三衛所來朝比諸夷優加禮待仍詔之遇有荒歉許其來告遣使賑卹之其頭目有子幼孤者依軍官優給例一體賞賚如此則彼感我深恩永爲捍蔽矣按石晉所賂契丹十六州地幽薊易漢涿檀順七州在山前新媯儒武雲應寰朔蔚九州在山後合前契

丹所自取營平二州通計之蓋十有八州也自是中國非但失其土地人民乃并其關隘而失之晉人自損其險隘與人既以自守其國宋人承其後而不能復中國之舊遂以白溝河爲界故二國所受夷狄之禍略同夫自晉天福元年以路契丹此地爲虜所得者首尾四百五十餘年我太祖始逐出元人而復爲中國蓋拔之于泥塗之中也太宗又于此建都則躋之天日之上矣夫以百二山河而有天然之地險重城萬雉屯百萬貔貅于此鎮壓之是誠萬萬年不拔之基也今山前山後皆吾中國之地山前七州今爲畿甸之地太行西來連崗疊嶂環而繞之東極醫巫閭之境以爲內之藩籬山後諸州自來寧樂西海治以西歷雲代之境重關列戍以爲外之藩籬苟委任得人守禦有法可保其無外患也惟昌平以東迤北永平一帶往者大寧都司與營義會等衛在山之衝以爲外障其後移入地內以此之故京師東北藩籬單薄之甚異時卒有外患未必不出于此夫天下之患往往出于意料之外然能謀畫于未事之先而豫有以防備之則所患者消泯于無跡也請下大

臣議居庸以東歷黃花鎮古北口直抵山海關之後皆荒漠無人之境非如居庸以西大小邊鎮兩層可以防備若何以善其后而使之永無外患必其遠謀宏略出於其間必不得已而有一見請將洪武中大寧都司後移保定者立永平或遵化或薊州以爲重鎮凡舊所屬衛所移于沿山要害相爲聲勢仍于山之後去山五十里或三四十里量其地勢因其形便築爲墩基就其空缺之地接連以爲邊牆就其間擇一要地設爲關鎮屯軍守備以爲兀良哈入貢之路不然國家養銳儲材俟吾力有餘而其機可乘仍復洪武中山後立關之舊俾與宣府大同列爲三鎮直達遼東之境則是國家之險要旣失復得藩籬厚而無可乘之隙根本固而無意外之患矣

朵顏福餘泰寧三衛初爲兀良哈地在烏龍江南漁陽塞北春秋時卽山戎重地秦時爲遼西北境漢爲奚酋所據後爲號庫莫奚服屬契丹元爲大寧路國初割錦義建州諸州隸遼東而以古會州大寧之地設北平行都司領兵營二十餘衛所武洪十四年封王子權于大寧爲寧

王二十二年封兀良哈爲朵顏福餘泰寧三衛以處降胡而以阿札失里等爲三衛指揮使同知爲我藩籬成祖靖難首刦大寧兵及召兀良哈諸酋率部落從行有功乃移封寧王于南昌改北平行都司爲大寧都司徒之保定散布兵營諸衛于京府之境而以大寧地界三衛東起廣寧前屯歷喜峰口近宣府爲朵顏自黃花泥窪逾瀋陽缺嶺至開原爲福餘由錦義渡遼河至白雲山爲泰寧皆逐水草無恆居三衛朵顏最強分地又最險自是遼東宣府聲援隔絕諸夷列我險阻闐我門庭要我官員殘我吏民喜峰三屯密雲白羊僅僅收縮譬之左臂擁腫則土谷孤孑後背偃僂則盧龍單薄梗其喉吭則遼海坐隔扼其腦背則陵寢警逼失計甚矣

本朝旣戍會州建大寧都指揮使司爲重鎮在宣府遼東之間以宿重兵洪武二十六年故元中宗室遼王及朵顏元帥各遣人入奏願內附爲外藩詔以其地居之在大寧之北境立三衛焉曰泰寧衛曰福餘衛曰朵顏衛以阿里失札爲泰寧指揮使塔賓帖木兒爲指揮同知海撒

男答爲福餘指揮同知脫魯忽察兒爲朵顏指揮同知領所部以安畜牧觀此則長陵時山後諸州先皆爲其屬矣今居庸之外恃爲藩籬者止宣府耳而遼陽一帶不可通也

申用懋曰石塘古北曹塞馬蘭松棚喜峰太平燕河台頭石門皆各夷撫賞之處嗣後部落日衆朵顏遂強陽順陰逆時時爲虜嚮導住牧喜峰口邊外會州青城之處附青把都部下三衛夷共爲二百七十枝酋長昂炒蠻董狐狸諸夷及夷婦大小嬖只猛可眞等號爲六凶而長昂尤黠云

又曰史車二夷故朵顏種嘉隆間相繼內附移住邊內周四溝滴水崖龍門所南山一帶受我撫賞萬曆十八年安免勾引叛去後以計擒史二官兒子女紅亥等順義擒獻史二官兒我列等其部落仍來歸安插永寧哱羅長安嶺各地方迄今照舊撫賞

馬文升曰嘗往年三衛達子偷盜大虜馬匹經過大同宣府邊上俱來報說我每在達子營偷馬匹還老營在某處報之今將一年宣大二邊

臣俱不曾奏報前因臣已疑有彼此相和之意且正統十四年因朵顏等衛達子與虜酋也先相和故有土木之禍臣又聞此虜大衆卽月俱在宣府住牧亦有東行者而大同無賊竊疑此虜奸謀若寇宣府山勢險阻若寇大同邊牆重複又各有精兵兼調延綏遊擊官軍在此虜意交鋒之間彼此各有所傷若彼朵顏爲彼嚮導引領大衆俱到本衛地方劄營或留虜衆在于大同宣府邊外制我之兵不敢東行彼無後顧之慮分遣精銳或從喜峰口或從燕河營彼處山勢平漫不數十里係腹裏居民稠密人口頭畜頗多朝入搶掠夕可計歸且軍勢寡弱豈能支持在京臨時發兵不無緩不及事成化年間朵顏衛達子曾由此處而入直至永平地方如蹈無人之境若此虜熟知道路剽掠日久京師未免戒嚴其爲國家之患非細也不可不早爲之禦也

鄔公閱曰大寧本奚部唐初其地屬營州貞觀中奚酋可度內附乃置饒樂郡爲中京大定府金因之元初爲北京路總管府領興中府及義瑞興高上都路至元五年併和州入柑州爲永和鄉七年興中府附爲



卷之五十二

州仍隸北京改北京爲大寧二十五年改爲武平路後復爲大寧戶四萬六千六百六十口四十四萬八千一百九十三領司一縣七州九我國初割義建利諸州屬遼東設大寧都司于惠州之地領營州左屯營州右屯營州中屯營州前屯營州後屯興州左屯興州右屯興州中屯興州前屯興州後屯大寧前大寧中會州盧龍等二十餘衛封建寧王府而于近水之處迤北降虜置朵顏泰寧福餘三衛授以都指揮等官太宗朝每簡其精銳使從征伐得其死力遂以虜兀良哈地以與之于是徙大寧都司于保定營州左右二衛于薊州中衛于平谷前衛于香河後衛于三河興州左衛于玉田右衛于遷安前衛于豐潤後衛于三河中衛于良鄉大寧前中二衛會州衛于京師盧龍衛于永平而寧府移付江西山後諸州半爲虜有矣

屈公伸曰近該泰寧等三衛已故都督脫脫孛羅男猛可帖木兒等差頭目把禿等赴京進賀萬壽聖節效順之意固可喜矣初見今年春夏以來該遼東鎮巡等官不次傳報緊急賊情俱是三衛達賊計合虜衆

要來報仇聲息又于易州地方搶掠人畜且出邊不遠輒便住劄又該錦衣衛帶俸指揮使等官楊銘等審得虜人中走回男子雷草番說稱三衛差百人到巡北虜營頭目脫羅千等處謀和今又譯審出把禿等和好緣由雖假爲此不得已之說終難掩其結構之迹也是三衛達子與迤北不同不可不早計也

尹耕曰開平元之上都也灤水繞南龍岡翼北形勝之地也元人以之肇基成化北代往來由之東路以接大寧西路以接獨石巨鎮隱然屏我山後遇有緊急則宣遼有首尾之援居常防戍則京師得封殖之固夫國家定鼎北平不患于帶几之無憑而患于肩背之失恃大寧旣委三衛開平復移獨石遂使京師之地僅存藩籬所關豈細微哉究論則屯田便宜于轉輸一勞可以永利大寧要害于開平易置亦頗非難五原在豐勝之外沙磧之間昔人且猶開渠屯田以規全利何龍岡之沃灤水之潤開平獨不可田耶又失開平則後背雖空尙有宣府獨石之固失大寧則左肩全弱宣遼隔絕矣故曰開平可田屯田可也不可田

則易置大寧可也昔劉秉忠諸人皆于開平樹藝卜隱則開平無不可  
田之地開平爲元故都山水之秀壤城郭宮闕而留其民居以爲三衛  
則三衛亦無不樂從之理二策無不可就也土人稱祿馳驅邊塞悉心  
經營然祿知僅于封疆之小利昧于夷夏之大防知懲目前之紛援而  
忽繼世之權變開平孤遠不易守矣而北門單弱之不恤餉道艱難不  
易致矣而屯田開墾之不求割棄境土三百餘里不之惜矣而易置三  
衛之不講此所以效成一時而禍伏異日恩加近塞而謀失遠猷智者  
窮源不能無慨也

往行

翼

西園聞見錄卷之五十三目錄 外編

兵部二

邊防前下

遼東鎮

前言

于謙 二則

李承勛 三則

許論

魏煥 八則

王瓊

佚名

賀欽

申時行

申用懋 三則

趙三聘

附西園遼東圖記

附己未西園聞遼警詩小序

往行 附

劉州鎮

前言

上海歷史文獻圖書館藏

魏煥 四則

許論

王瓊

申用懋 四則

往行 四

宣府鎮

前言

于謙

李秉

佚名

魏煥

王瓊

葉盛

楮寶

佚名

徐溥

申用懋

往行 四

大同鎮

前言

許論

魏煥 二則

佚名

史道

王瓊

翁萬達

尹耕

申用懋

往行 四

山西偏頭關

前言

申用懋

王士性

往行 四

西園聞見錄卷之五十三

外編

嶺南 張 萱孟奇甫 輯

兵部二

邊防前下

遼東鎮

前言

景泰三年于公謙曰遼東地方極臨邊境西自山海關外起東北直抵開原沿邊衝要平坦處多海州遼陽迤東雖隔遼河亦有難可通人馬廣寧義錦州寧遠前屯一帶曠野別無阻隘俱難設伏西北大寧舊遼陽河上哨兀良哈三衛達賊東北腦溫江松花江灰扒江黑龍江海西各種野人女直東南漢猪江河迷等處建州三衛女直接連巢居往來在邊住劄近年以來前項夷人有挈家投順脫脫不花又被收捕聽其約束指引來邊爲患今又被也先收併出沒不常賊情難測緣遼東所

屬惟廣寧開原貳處最爲緊要原有鎮守太監總兵參將等官在彼團兵其餘各城人馬俱在本處隨操每年春夏量數分布邊堡防護屯種秋冬拘收人畜歸併回城在操官軍常川巡瞭上年天雨連綿衝塌墩臺壕牆累督修整完日照舊隄防今奉勅旨從長計議臣等公同衆議副總兵焦禮施聚各不妨守備寧遠義州地方但聞廣寧虜衆寇邊聲息星馳前來會議同右參將劉端內使覃璣領兵當先臣同太監宋文毅左副都御史寇深調度殺賊內焦禮劉端就分巡遼河迤西直抵前屯衛地方遼陽瀋陽海州地方有警左副都御史李純同掌都司事都督僉事王祥等領兵出戰王祥仍不妨掌管事就分巡遼河迤東至瀋陽地方開元鐵嶺有警左參將都督同知胡深同左監承范英內使章明領兵出戰胡深仍分巡開原起至蒲河地界各量領人馬時加往來巡督修理城池邊堡墩臺壕牆整點軍馬器械務在堅利完固及督各城戰守都督指揮梁宣宋政魯金孫璟周英鄧鐸等如法操練軍馬固守城池謹慎隄備若遇有警星馳傳報臣同宋文毅寇深相度遠近事



勢會調鄰境軍馬隨機應變及查得各處合用糧料止是本處屯軍種納子粒并銀糴米豆支應別無有司供給見在糧儲止穀本處人馬一二年支用以後陸續收積等因參照所奏係于備邊地方總兵官曹義等會同各官議處停當具奏俱合准擬仍行曹義逐一依擬施行臣等又議得遼東地方相離京師不遠又有野人女直各種夷人周迴雜處而夷虜之性變詐不常瞰我邊備虛實以爲從違向背往來靡定叛服不時或陰附強寇而搔擾我邊或窘于饑困而搶掠頭畜逼逐緊急則逃遁防閑少緩則復來卽日各邊俱報有烟火聲息而遼東一帶墩臺上年因雨水連綿多有水浸坍塌卽今雖稱修理完固誠恐總兵等官不曾差委的當人員著實點看止憑哨守官軍回報因而有名無實遇警不能接報以致失誤事機合令曹義寇深等務在前項議設備邊方略倘有緊急賊情毋托諸空言必要見諸行事以副朝廷付托之重以銷殘賊反側之患以爲邊方保障之計以爲經久利便之圖如或言之有餘行之不足以疎虞邊務責有所歸

卷之五十三

又曰遼東地方自春以來達賊犯邊墩堡被其挖掘人畜被其殺擄如入無人之境全無忌憚之心詳其所由蓋由遼東總兵等官互相矛盾彼此猜忌既無安邊禦侮之謀亦無折衝奮發之勇在上者既不能同心協力在下者亦莫不解體沮氣以致寇賊縱橫恣意搶殺而曹義等視之漠然不動似此怠忽若不嚴加譴責卽日秋高馬肥正係達賊肆志之日又况遼東切近京師止隔山海一關便係腹裏慮恐賊寇益肆倡獍結連諸種部落大舉入寇臨期倉卒愈難措置不無貽患邊方有誤大計伏乞賜勅切責宋文毅曹義寇深等數其節次玩寇失機之罪令其嚴謹固守地方謹慎哨瞭一乃心力用濟邊務毋相矛盾以誤大計仍俟胡源回日動靜若何務要和同計處要見前項賊寇是何部落實有若干其巢穴有無定止從宜設策選調大軍出奇勦殺以剷賊人深入之謀以安邊人固守之志有功照例陞賞失誤取罪匪輕若縱賊寇縱橫而不慮視邊人被害而不恤及輕率無謀墮賊奸計以致疎虞壞事者罪有所歸再照野人女直各種夷虜之人俱附遼東地方近來

相率收降者多朝廷推以曠蕩之恩宥其反側之罪許以改過自新授以官職加以賞勞而遼東總兵等官往往定議就于遼東自在州并東寧等處城堡安插者動以千數此等之人狼子野心難以測度卽今彼處犯邊得志我軍失利遂起奸謀結連內應其貽後患終非細故矧近日遼東安插達人糾合謀反出城潛從賊寇動至一二千人此正其驗不可不防合令寇深公同宋文毅曹義等通同計議區畫將已安插夷人若何設法關防撫卹鈐束以銷意外之虞以爲經久之便及後來降者俱起送赴京處置或量與官賞令回原處住種何者爲宜或別有長策可以安內攘外防患弭奸令寇深等具由馳奏及勘原議不當因而處置乖方重爲遼患者仍令該府通行永平山海宣府總兵等官將前項賊情用心隄備遇警相機行事

李公承勛曰明春開原將有事于修邊今冬先須親詣彼處相度事勢規畫糧料過瀋陽涉蒲河經懿路循洮河邊牆處處倒塌墩臺僅存類垣是邊防之狼狽不獨開原一處爲然也又行至鐵嶺訪舊疆界今已

盡棄約七八十里之廣西則三衛達賊直至定遼河東則海西達賊直至背陰山中間止存一路不及里餘行旅尙被搶殺田地曷敢耕種若背陰之路不通開原之咽喉遂絕雖有智者不能爲之謀矣是開原之危急不獨三萬遼海二衛爲然也及抵二衛地方殘破之狀官軍愁苦之容有不忍正目者臣自任事以來見得二衛軍多逃移極力招撫未有應者迅蒙聖旨大發內帑之金又有欽賞之頒然後逃亡來者頗多昔日開原殘兵不滿一千今四千有餘矣鐵嶺兵不滿數百今一千餘矣臣每見復回之人處處駐馬詢其生事皆以手加額曰目前感戴聖恩粗可度日但恐日後衛所科差逼迫出辦不前難以存活蓋殘破之餘招來固難撫處尤難招來之後不繼之以撫處則招來之人又將散而之于四方矣譬之久病尫羸之人必須屏絕一切外事專心調理庶有可生之望若少擾之則其死必矣史譏劉琨長于招懷短于撫御臣以爲不然現人臣耳撫御之策非遇明主將安所施故有周宣中興之聖而後能成勞來還定安集之功今臣身處邊方幸賴聖明在上謹具

撫處事宜除暫免屯糧已經會題外今將查訪過地方應合施行者三事仰塵睿覽倘蒙採擇施行邊方臣民不勝感幸

又曰開原舊額有堡八所墩臺一百六十餘座當時將領得人邊防嚴固雖有達賊勢無能爲近年以來選將不問勇怯惟金多者得之邊牆任其倒壞而不修臺堡任其沖去而不報但遇地方有事即便厚斂彌封年復一年其弊滋甚八堡已沖其五墩臺俱各失守烽火無從傳報按伏全是虛名屯田之人殺擄殆盡達賊直至開原城下人尙不知以此城中軍士有田不敢種有山不敢樵坐食空城張頭待哺饑死之人無日無之可爲至危至急之秋矣今欲查照舊規調取金復海蓋等衛修邊夫丁一萬六千餘名每年以三月爲期動工兩月而罷調本鎮精壯軍馬一萬二千督率前去劄爲四營外爲禦虜之計內施畚築之功兩月功畢即便散還將原先守堡守臺兵馬發去填實傳報烽火自近而遠以次開闢闢一尺則守一尺比之暫來暫去有名無實者異矣又曰訪得海西等衛夷人其部落多者不過數百人少者不過三五十

人每入爲寇必借人借馬相期數月而後能舉兼其酋長凶惡者固多而向善者亦有又有一種土人俗號爲土高麗者住近開原人素驍勇舊日亦曾效用若開誠心以招之懸厚賞以誘之上則可使以夷攻夷中則可使黨與離貳蠢爾小夷若猶愁惡不悛仍來犯我邊陲擾我工作則其數亦不能甚多當督率三軍邊謀戮力或據險以遏其入或設伏以邀其歸乘虛以擣之用間以疑之多方以誤之敵人不畏未之聞也

許論曰遼東禹貢青冀二州之域舜分冀東北爲幽州卽今廣寧以西之地青東北爲營州卽廣寧以東之地三面瀕夷一面阻海特山海關一線之路可以內通亦形勝之區也歷代以來地皆郡縣我朝盡改置衛而獨于遼陽開原設安樂自在二州以處內附夷人其外附者東北則建州毛隣女直等衛西北則朵顏福餘泰寧三衛分地世官互市通貢事雖羈縻勢成藩蔽是以疆場無迤北之患顧東北諸夷屋居耕食不專射獵警備差緩而西北則俗仍迤北竊發頗多若大舉入寇則亦

鮮矣故遼東夷情與諸鎮異要在隨勢安輯處置得宜先事申嚴防守不墮俾恩威並立足制其心斯計之上而俘斬論功則第二義也開原廣寧並據襟吭金復海蓋頗稱沃野海上自劉江之捷倭寇絕跡弘治中曾一見之未及岸而逝若今則晏然久矣三岔河南北亘數百里遼陽舊城在焉草木豐茂更饒魚鮮自國家委以與虜乃遂進據腹心限隔東西守望勞費道理迂遠遼人每憤憤焉成化以來論者率欲截取而屢作屢輟竟不可行無亦有識者爲啓蒙邊方之慮乎他如草馬市之姦欺糾收驗之抑勒塞請開之貢路禁驛傳之騷繹增臺軍之月給教百姓之儲蓄專制一方者不得不任其責矣

魏煥曰遼東之地東至鴨綠江西至山海關一千四百六十里南至旅順海口北至開原城一千七百里元季時爲平章劉益高家奴分據洪武初奉表來歸四年置定遼衛八年改爲遼東都司十年革所屬州縣設衛二十五永樂七年于開原遼陽復設安樂自在二州以處內附夷人自湯站抵開原隣建州毛隣海西野人兀者諸夷而建州爲最自開

原之北近松花江之山寨夷亦海西種類又北抵黑龍江之江夷而江夷爲最自寧前迤東抵開原隣兀良哈三衛而朵顏爲最

又曰北鄰朔漢而遼海三萬瀋陽鉄嶺四衛之統于開原者足遏其衝南枕滄溟而金復海蓋旅順諸軍聯屬海濱者足嚴守望東西倚鴨綠長城爲固而廣寧遼陽各屯重兵以鎮壓之復以錦義寧遠前屯五衛西翼廣寧增遼陽山東諸堡以扼東建遼之保障困于地之迂遠今三岔河南北數百里遼陽舊城在焉木葉白雲之間卽遼之北京中京地也自委以與虜進據腹心東西限隔道路迂遠若復其舊則城堡士馬芻糧亦可省十之三四也

又曰遼之諸胡古山戎也昔者中行說之教單于無愛漢物所得繒絮皆以馳草棘中使衣袴敝壞以示不如旃裘之堅善也得漢食物皆去之以示不如醺酪之便美也是故匈奴日強不能制焉今之東胡則不然得尺綺丈帛則寶愛之其富者華服綿繡金珠雜飾以靡麗相高貧者垂涎睥睨專事偷盜以赴市故馬市交關互以名馬易錦綺數十尺



獲餅穀鹽酒之勞其甘若飴此侈其心以棄其所長實我中國之利也  
往者速長家之死數十百人徒手就戮去而復來如魚之思餌鳥之思  
食雖間之使去未能也故善馭之者謹互市之交易可不戰而馴擾之  
此賈生三表五餌之餘技耳今誠得人而理之取椿朋銀以市馬歲可  
得萬餘匹卽軍人無馬驗給而入其值餘以充太僕寄養騎操不數年  
馬可登息矣乃率以紕薄短小之物詒之欺其不見而襲取之威之以  
勢而擅奪之失其心者數矣而又利歸貪猾禍隱疆場善觀變者覩之  
于未萌是豈可易而忽之哉

又曰維遼之東南崇山大海海有島流徙之民聚其間者曰島民聚于  
萬山之間者曰流民是皆四方亡命流徙自食其力而罔知官府之法  
者置不問則無以渙天下之羣而有意外之虞繩之以法則是激以賈  
禍也故爲之清查爲保甲爲之解發爲之類編差銀皆求以治之而卒  
無抵于成此其勢有所不能而處之無其方也夫茲地也其在前代至  
繁庶也其半爲朝鮮北界及遼金爲郡邑者幾二十餘今以流移之人

散處其中而無所統屬之是能保其恆晏然哉是故設憲臣以撫治立州縣以分治隨其居止俾之保伍聯什曠以三數年治其役與有司等則其人安土而樂生安土樂生而後刑罰教化加焉卽不得已而藉兵供役數十萬衆可集矣

又曰遼之邊隘莫先寧前蓋自紅螺失守興中淪沒退而濱海一綫之地耳說者欲拓一片石抵椶木衝以廣屯種茲其小者也夫開原東隣建州海西北隣山寨江夷西隣福餘大寧自清陽迤西抵鐵嶺營堡六十有三而墩空數百自鎮北迤西抵湯站營堡一十有八而墩空亦數百蓋其建置之初計小遺大迤東迂北柴河洮河有警則鐵嶺不南懿路不北開原四戰之地也自廣寧師行十餘日吉行五七日遼河渾河三岔新橋之淖寧不計焉若不復南行而直西向繇鎮北抵山海行可五六日并其城堡墩空提重兵以防禦設遊兵以巡警東西合作首尾相應營堡城空先計而後隨置之蔑不濟矣攷之木葉白雲之間卽遼之北京中京地也今其城垣塵舍蔬圃確磨尙存焉者顧乃委之草莽

不亦重可惜也哉夫拓邊則有三利焉省兵糧也據要害也廣土地也消息便利存乎其人焉耳

又曰粵觀上世遼之通中國者未嘗不由海道舜分十有二州則青之東北境也漢武遣樓船將軍亦浮海而東下迨孫權之于公孫度隋唐之入高麗我國家之平定哈納束皆由是道管之還圖欲之奔亦由海而南是故無棄置不相屬者山東民運廢自弘治間而海船不通矣且山東之不利于海運也徵解之艱風濤之險也輕齎折色則有司之事易集故忘經國之大計而苟且支吾于是遼爲東北絕域入中國者一泥丸可塞矣寧前有警扼山海之吭據沙河之阻則永平無左臂遼西無右臂批其左右臂以鬪兵法所謂死地也且倭寇自劉江望海蝸之捷迄今幾百年矣墩哨營堡空虛草莽萬一樓櫓奄至其何以爲備哉誠使修復運船申嚴程法則人樂易人樂易則知險夷知險夷則預趨避預趨避則衆習熟衆習熟則上可以供億軍需下可以貿遷有無近可以設警備倭遠可以備營緩急卽東南饑饉轉遼東之粟以濟之又

盡則疏廣寧火燒橋以達潮河溝引吳家坟汙下之水注之則自三分河可達盤山矣由寧前歷右屯剪子河入遼河則河東之粟可達山海矣由黃泥凹自境外入遼河以達開原老來灣則國初運道也茲又拓邊以後事也而說者視爲迂談蓋亦弗思爾矣

又曰遼有苑馬寺統監圍以畜牧有行太僕寺司簡閱以畜馬立法之意未始不善也積習漸久曠廢益滋兩寺之卿并除陞轉動以年計以政多委之他司縱使當其任者日日而治之事事而度之所謂孳牧之房寡印烙之肥瘠率多陳迹故事轉相虛應存乎其名焉耳矣間有豪傑之士剔洗而振作之類網斷領隨手剝落而又侵官生事之謗興此無他上下相習而窮不能變也若少變其法以原官量兼憲職苑馬駐蓋州兼理東南流聚之民太僕駐開原兼領東夷一應機務凡朝貢互市攻守芻粟之政皆責成之而與其便宜是謂不易局而勝不變市而理斯固安危之機也

又曰先王聯萬民以比其情于是有井田之政敦其死徙出入守望疾

病焉于是乎安土重遷而公私戮力管子之以內政制兵也使之夜戰聲相聞晝戰日相及夫然後可以威敵可以和睦民可以使之不崩不流不渙不戕夫然後可以教今之爲將領爲都指揮子孫聽襲他衛故遼北無世族而遼陽多大家夫是之故多亂政土官復其戶故奸人得影射而衛所多逃匿夫是之故多亂民亂政亂民則下欺亂政則上欺居常且有侮而况禦外虜哉若檢勘改襲逃移之家勒歸原衛若伍則可以聯其情而後積其羣不渙而情同聖人樂以使民之道也然官復其家若干而以其若干役重藏匿投托之罪則政無頗僻而輕重適均均其役而愛同先王奉三無私以治天下也嗟乎是豈獨遼爲然哉

王瓊曰國朝自山海關以東置遼東鎮周迴數千里蓋兼古幽營之地而有之設都司一衛二十有五州所各二以控制之其外諸夷各因其類設衛三百二十八所二十四各授以官職令每歲來朝以羈縻每衛不過五人至于朝鮮尊奉正朔歲入朝貢視前代獨爲恭謹內安外順固無足慮然以海西建州女直諸夷往往桀驁難制成化以來議當勦

者恆以姑息從賊爲害論當撫者又以貪功起釁爲非然其機繫于本兵必欲視順逆之勢得剿撫之宜而處之不差斯亦難矣嗚呼金起女直據中國遼東邊備其可忽哉

□□□曰義州古曰義州在醫無閭山之右有虞封十二山時卽爲中國之地矣秦漢以來或得或失我太祖高皇帝掃蕩腥羶混一四海爰命功臣龍虎上將軍都馬公□葉公旺繇東萊航海來遼招附而經營之設遼東都司焉義州之境廣環百餘里東羽廣寧南庇錦州西引大寧大寧諸城亦一都司也惟北鄰與虞隣耳永樂間郭玘以朵顏三衛達子效順遂徙大寧諸城之人于北直隸而以其地與之義州兩面受敵之區緣邊凡百六十里最要害焉正統初提督軍務都憲鹽山王公九臯乃劄立馬營堡每堡守以餘丁五十人小官一員城中官軍輪番設伏內則保庇耕牧居民外則救援臺空戍卒小寇入則粘跡斷其歸路大舉至則協力助爲聲援在彼有腹背之虞而在我有犄角之勢又凡在城官軍每一至邊有所止宿而無暴露奔馳之苦垣塹臺空一有

壞缺營之軍丁卽時補治無久壞大壞以致調夫勞瘁死亡之患此實報邊禦虜久安長治之要術也自後以北虜入寇暫撤官軍以避其鋒遂因循而廢棄焉弘治六年參戎金臺王銘修建天清一堡填實官軍五百餘尙在丘墟榛莽間有識者嘆嗟而已弘治戊午以來邊備益弛虜患大作始而窺卒攻臺空以疲敝我兵馬繼而掠耕牧竊屯堡以戕害我人民已而擁衆深入掩覆官軍以蹂踐我土壤雖晝行官道夜宿園廬者猶不免焉嗟呼虜寇之勢熾官軍之氣沮膏腴之田棄農桑之業荒死亡流徙何斯民之不幸也弘治庚申參戎襄平韓良弼慨然以起敵爲己任巡撫督理軍務山東張公用和巡按閱實兵備侍郎江右余公宗周俱汲汲以修建營堡爲保邊首務曰大清堡西南堡同大寧大康大安定甫踰年而皆以次就緒每堡填實多者七百少者四百人俱軍舍餘從焉于是授以附堡田土使之耕且以漸包砌而擢賢能官以守之自是聲勢聯絡內外倚伏邊境無虞六堡舊名清河義寧鎮虜青榆林大安綏遠今五堡新名則張公之所易也

賀欽曰往年東人屢欲展遼東省奪三岔河之北老虎林謂其地沃饒耳自廣寧至開原甚遠雖督明重臣亦往往惑之嘆曰今日視祖宗時強弱如何民不聊生倉廩空乏守其見在者可矣奈何爲此好大喜功之事以殺吾邊人乎且東人之所不安者患在無政以養之耳非患地狹也或者勞力而成爲利幾何而兵連禍結寧有已時況時詘舉羸尤古人之所深忌者也

申文定公曰遼左邊長兵寡虜日夜伺間而入得保全城堡幸矣而言者過于責備謂必使虜不入而毫無所失乃可論擒斬功何言之易也書生不知邊事輕搖筆端徒增一哂耳

申用懋曰查舊遼陽在邊外西行二百里至廣寧東行三百里至開原其地介廣寧開原間相去五百餘里而今夾河爲塞紆行八百餘里地故饒虜芻牧其中東北則犯開原東南則犯廣寧中則犯遼陽海州誠遼左腹心之害云

又曰遼故沿海屬山東自金州旅順口達登州新河關計水程五百餘



里而海中島嶼相望遠可百里近止數十里舟易停泊先年山東歲運以給遼糧數有無彼此兩利嗣因亡命竄入海島爲患設禁始嚴遼自是坐困矣萬曆二十五年以來議從海運餉東征士卒其禁稍弛而旅順復設遊擊以防海彼此相通聲援易及雖則爲運實所以爲防也又曰遼東東起鴨綠江朝鮮界西抵山海關南起旅順北抵開原外邊九百餘里三面瀕夷一面阻海雖山海可內通中有三岔河爲遼陽舊城自洪武壬子淪于夷全遼始兩岐矣河西地近土蠻潛引諸夷時爲邊患而嚴冬冰結卽河東亦闌入焉萬曆癸巳以來朝鮮被倭出師往援遼左驛騷迄今未已蓋虜與倭兼備云境外有虜酋土蠻等部落住牧東北有建州毛隣女直等衛西北有朵顏福餘泰寧三衛俱互市通貢查得遼陽前屯開原義州寧遠錦州鐵嶺鎮武廣寧中後所中右所瀋陽鎮靜清河懿路長勇中前店山長安沈河西平中左所慶雲武靜廣寧右屯鎮西清陽俱極衝者

趙憲副三聘爲戶部監餉遼左日廣寧北有牽馬嶺道迫陞騎過必下

或議開之以度諸乘障者公曰此一綫之路我能往虜亦能來開之不虞延虜入室乎其後虜果從其地內犯衆乃服公先見

附西園遼東圖說

歲己丑余移家金臺小侯西寧宋君世恩平江陳君佳胤李將軍如松皆以筆研定交間習騎射最驩余既下第遂爲平津所館穀間從三君較獵于遼陽廣寧之間北踰肅慎東瞰鴨綠指點山川閱歷險要凡三越月半皆寢食馬上因倣鄧仲華之聚米爲遼東圖而詳著其說以告防遼之枕上過師者戊戌冬余方通籍西省時肅慎氏且蠢蠢動矣欲以此圖疏聞條上機宜妄有請纓之志輒爲當事所沮然老驥伏櫪絨此圖于塵笥中有請而閱者亦間出以示之嗟今之日中余之言亡羊補牢計亦未晚愚而千慮亦有一得彼肉食者慎無以杞憂贅恤而唾地也遂次第圖中諸說以著于篇

建酋最狡知廬居兵至二萬得訓練之法又築立城堡防守甚嚴假互市以私通遼人而復陰結宰賽諸夷人以寇邊乘間竊發欲收下莊之

利誠叵測可慮者也按奴酋不和于弟又不能恤其部落每市賞回必取諸部所得之物遍觀之悉取其善美者以盈己欲而後分給于下卽毛隣野人之黨無不受其荼毒者亦以威臨服之耳如欲問酋之罪當乘此間隙之時一軍出撫順一軍出發陽一軍出寬奠直搗其穴而又檄朝鮮以圍其東檄養逞諸夷以圍其西同時並舉相爲犄角使奴酋首尾牽制左右受攻將請死不暇敢逆我顏行哉有謂得此不無增兵增餉之費愚意此地旣復則舊寬奠等處皆爲腹裏卽移寬奠諸堡以鎮之又何有增兵增餉之煩况諸山有無窮之產正遼人窺之以爲利者誠得之人將放死守之矣距建州西去五十里有鴉鶻關從橫江直抵發陽僅十八里若于此築邊牆一堵則諸山千里悉屬我有而奴酋自不得垂涎于此矣又距建州西十餘里爲建夷部落虎失住牧之地其家口五六十皆以射爲生往來臨邊不絕又西十餘里建酋所設中軍張海頭目千古里木牛籌住牧于此相距數里亦建夷部落猛住赤那諸寨住牧家口凡四五十離邊二十里每令猛崗頭入市又南十餘

里亦建夷部落卽麻子王加奴張滿奇張乃奇等住牧之地入市甚近  
變陽城去邊僅二里舊兵一千新兵五百稱極衝之地但山險難犯又  
東去十里爲寬奠城去邊亦三里舊兵三千新兵五百近爲極衝  
鎮江城卽九連城也去鴨綠十里而去邊稍遠兵馬二千可以自固西  
六十里至湯站堡自此而南稱腹裏

南關者奴兒哈赤之西界爲猛孤哱囉地亦海西部也近爲建夷所噬  
擄其妻及長子以去惟次子奔投廣寧所宜急論追還以固外藩

北關者在南關稍西爲養家奴逞家奴白虎逞等住牧之地出沒之所  
此酋舊與建夷爲婚媾近以互爭猛孤哱囉之地遂爾成隙故奴酋雖  
新與宰賽聯姻而不得頻頻往來合力者以三家爲之中阻也養逞孫  
爲白羊骨金台失奴酋責其負婚責其匿壻卜台吉構釁尋兵金白求  
援于我卜卽江夷被奴攻而遁者

舊遼陽城在廣寧極北未失此城之先從廣寧逕至開原堡僅二百餘  
里自此城失而諸虜住牧其中以致道路阻塞不得不遷其途至七百

餘里而沿途墩堡愈慎戍守愈衆是我內地盡爲外夷所據矣尙當事者垂念舊疆力圖恢復當求盛夏虜皆畏暑之時以廣寧之兵一壓其境而以開原遼陽之兵翼擊之仍令薊鎮士馬爲之聲援則虜必鳥驚魚散矣然後卽鎮安鎮遠堡之兵將以守舊城更多置戰車精造火器以防其復來則遼其永固而東又增一藩籬矣舊遼陽城之北爲宰賽抄花卜台吉願把兔兒媛兔伯牙兒住牧之地常爲邊患又西卽三岔河之源頭爲長漢等八家達子住牧遊獵每從鎮靜堡求賞互市所隣諸堡屢受其害

自盤山至三岔河之西爲西寧堡皆依河爲邊號稱極衝又苦無水亦云危矣但其地貧無足掠者故虜亦不至

沙嶺堡北距鎮武堡六十里去邊二里無兵可衛無險可依軍民五百餘家又苦于無水難耕

松山所號小衝兵五百軍民千餘家

杏山驛兵五百軍民四百餘家

塔山所南距寧遠六十餘里去邊二十里最衝兵一千軍民四千餘家可屯

連山驛北去塔山所三十里南去海八里去邊二十里歹青住牧之地但城堅可守地廣可屯

遼陽城離邊六十里稱極衝之地屯糧二十五萬三千二百零一石主兵年例銀一十六萬二千九百九十六兩客兵銀四萬兩

蒲河城在瀋陽之西北相距三十五里東西隣虜兵馬七百軍民千家亦稱極衝

懿路城西南距蒲河城四十里兵馬七百軍民千家

沆河城北距鐵嶺三十里雖東西隣虜但有高山西有宋家堡邊牆兵六百軍民八百家亦可以自固

鐵嶺鎮東西去邊皆五十里有兵三千軍民萬餘家守防最宜慎也

中固城在開原南四十里西去邊二十里東去邊五十里兵三百軍民五百亦極衝者

從宋家堡至鎮北堡凡二百里近日熊按臺廷弼所築邊牆誠爲遼東之利然必相繼修葺乃無傾圮之患則遼其永賴矣

開原三面隣虜爲孤懸之地今西北得倚邊牆爲利而東之廣順爲通市之地防守稍弛虜卽中之矣兵三千軍民萬餘家稱極衝者

從旅順海口北抵開原境外凡九百餘里

慶雲在開原之西一帶皆稱最衝今改設遊擊以鎮之舊兵五百新兵三百故又造小城以居之爲宰賽等入市之屯

山海關東去五十里爲前屯衛兵三千軍民六千家去平川三十里爲虜出入之地號極衝者

前屯衛東北三十里有沙河驛城堅可守地美可屯中前所離邊十五里西距山海關三十五里稱極衝之地兵五百軍民千餘家但其城堅可守而地多肥美實可屯之處

中前所東北十八里爲高嶺鋪無兵止軍民三百餘家地美可屯

中右所去歹青僅二十里去海三里兵一千軍民二千家地廣甘美爲

可屯之處而城堅可守

中右所北去三十里至東關驛無兵止軍民三百餘家去邊三十里稱最衝者地廣人少可募以屯

寧遠城去邊十五里北皆大山爲韃子出入之所去海三里爲極衝之地兵一千二百餘軍民二千餘家地少荒蕪城可自固

按遼之傳烽有未盡善如虜驚東則宜傳之東可也乃今一處有警處處傳烽而全遼士馬爲之雲集倘虜有聲東擊西之狡得無狼顧之患乎必倣薊鎮之傳烽乃得

按全遼兵馬原額馬步官軍九萬四千六百九十三員名今實在官軍八萬一千九百九十四員名馬原額七萬七千一匹今實在四萬二千八百七十五匹

按夷虜之性最不可測其虜之來歸我也止宜以恩結之使戀戀不忍舍而後可倘爲之將領者恩不足以固之則旋降旋去安知不我于之虛實而爲彼之向導反將逞志我輸也



按兵法曰毋恃其不來恃吾有以待之虜至而後備亦已晚矣彼虜凡大舉我之探聽者能知之幸月之前或一二月之前我測其必犯之路而伏以倭弩火炮毒煙之類使彼一踏發其機虜自遭創又于所必掠墩堡設以空營之法待其來時衝動旗自舉鼓自鳴火器自發虜必驚潰然後以伏兵掩殺之則我有全勝之謀而彼無逃遁之所矣且虜性于失利之處必不再犯我處處誘之在在創之則虜之逆萌將自銷矣不然見兔顧犬亡羊顧牢鮮克有濟者然此法豈獨可以救全遼推而行之則各邊可晏如也

按遼軍之苦無如守臺者以其糧與衆同而瞭望獨苦且一臺之中僅三四人其間或有逃亡者或爲虜擄去者不爲勾補致一臺僅存一二入其臺之高者在山之巔而薪水之苦必竟日乃得一往還則其人已倦于薪水豈有精神爲之哨守乎其疎虞大可慮者愚意當行番休之法以恤其苦當議增糧之說以償其勞當嚴清補之條以防其疎三者備而後無獨苦之病亦無弛怠之憂者矣

按屯政爲籌邊之首務而其壞也以鹽政之廢也愚見全遼之間肥美可種者甚多而棄之荒蕪若是致產當事之憂虞愚意當首復鹽法次豁罪民次廣召募如能開百畝則授以百夫長千畝則授以千夫長之類不數年間蕪穢皆成沃壤矣以土之兵食土之毛又安有不足之患哉

按海運亦實邊之長策往間行之而遼受其利其後或以風波之險遂議革焉愚意誠得舟師之善操舟者且能履險若夷如近日貨船亦每從登萊至旅順曾無傾覆之患而遼之物價稍平倘復海運則易于陸輓數部而遼寧無少利耶

按遼之買馬多取足于宣大以致風氣異宜水草不服逾年而斃愚見遼多善馬卽取之土產亦自足以衝虜何必拘拘西馬之名而徒費于帑金爲也

附己未西園聞遼警詩小序

李公夢陽秋興詩有和戎劇戎急備遼東之語不幸而中矣余居常謂

戰守和三策合之則並美離之則兩傷故善戰者始可與守善守者始可與和旨哉直指王公之疏遼事也宋之病不在和而在不守余莊誦及之近有勳貴疏言守不宜戰者此與耳食何異夫鑿池築城如湯如金時芻粟如坻如京而將不勇兵不精馬不良墨守固堅輪攻更巧若市鬬然人擎拳矣我束手乎故撫順開原鐵嶺相次告潰余終不敢蔽罪于諸公之不能守也當事者以爲何如

奴酋蠢動繇守邊者不得其人耳李廣守雲中射鵰兒不敢近塞何至一矢相加遺哉今之上策往駐一軍于鴨綠江頭以躡奴酋之後或深其阻如韓淮陰之拔趙幟奴雖善戰有不狼顧者吾不信也第鴨綠新軍尙須借箸金城方略殆非可言詮也

宰賽故嘗羈縻于我啖我貢市之利數世矣而墦于奴亦從其類耳間者爲王前驅固不必拒今復歸奴軍府亦不必追蓋狼心終異鴉目可憎翁婿之情兒女之態攢刀雖誓同穴難忘胡恩日深漢恩日淺飽而颺去安知不爲翁侯信乎歲己丑余家長安李將軍如松數以稱詩從

余遊時有胡雛甫數歲爲將軍養子攜之長安邸中嘗孩之而語余曰此肅慎氏也余笑而問楷矢今三十年遠矣不知此胡尙無恙否第養虎貽患將軍之目其能瞑乎

奴酋包藏禍心非一朝夕第漢過不先耳車輛之削所利幾何矚然不庭霜已履矣懷晏安而飲酖毒雖欲分謗其可得乎今樵蘇後費庚癸頻呼而前非樂毅後皆騎劫遼不可支矣倒戈債師尙藉口于必圖歸漢如李陵之給司馬遷也誰其信之嗟嗟節節雜于靡蒸屈原與嗟夫女固爲悅己者容耳我實有雀我則鼓之酋不爲叢雀將焉往楚材晉用當事其蚤計焉

奴酋數爲遼患以江夷爲犄角而江夷又以阿哈諸夷爲爪牙嘉靖戊申江夷常通兀良哈寇遼而伯牙兒者乘間竊發遼遂大困歲辛丑余友萬公世德總督薊遼與順天巡撫李公頤實戡定之于是伯酋悔罪叩關以長安之例爲請遼復貢市孫武子曰霸王之兵威加于敵則其交不得合又曰其次伐交兀良哈業已耽耽阿哈亦且蠢蠢五間其可

少乎若棄瀋陽而守遼陽余竊三嘆夫瀋陽距遼陽三十里而近左爲清河城右爲蒲河城而懿路城沅河城分距其後皆必爭之地也瀋陽不守四城復爲我有乎奴破開原且能越中固城而取鐵嶺四城不守如入無人之境遼雖金城湯池與奴共矣遼之幅員幾何今日失一城不敢問明日棄一壁不暇顧余不能保遼之終爲我有也豈乎殆哉孫武子曰不用鄉導者不能得地利吳子曰夫人常死其所不能敗其所不使夫樵當問山漁當問海南北之不相便而不相爲能卽一童子辨之以南兵禦北虜以召募代土著是以羊禦虎以卵投石旣無一利且有百害卽孫吳爲將亦難倖免者今齊趙燕秦之間如馬如董兩家皆將種也人不失地地不失敵可以百戰而無一失嗟嗟十步之內必有芳草懸金市骨藏袴待兵當有窺左足而先應者奈何驅東南搏沙之市人以當西北浴鐵之狡虜乎

今之談邊事者皆救敗矣然表裏虛實之弗知君臣佐使之難進是益之敗也見垣一方者能不望而走乎嗟嗟一枰之內下雹流星奪角衝

關南風不競安得起于公于九原與之語刳

余論海運詳矣具疑耀中今勸遼餉運尙存遮洋一總載在令甲祖宗之慮遠矣是役也輓巾數聞量沙難再海運之議當事者業已稍稍舉行而下瀨戈船尙未繼進豈對壘不暇于探穴束馬亦捷于揚帆耶余按自膠萊導成山沂石河驛抵遼陽旬日之程耳又自石河轉金州入朝鮮市場沿橫江而北直達于古里木牛等住牧之地風汛不愆計程半月足食足兵無便于此魚腹是虞烏餐罔顧肉食者鄙矣天不厭禍奴而厭兵伯牙兒之故智有豸焉異日者晉楚之從交相見也其當事稅駕之所乎嗟嗟天生五材誰能去兵宋子罕之慮亦遠矣

外夷奉我正朔者唯琉球爲最謹蓋不侵不叛之臣也不幸而折入于倭已數年矣當事置而不問豈藏獠之疆方復師徒不宜煩興抑疆場彼此亦何常耶間者朝鮮從師未聞吉語或瘡痍未起故鬪志不堅耳嗟嗟雖鞭之長不及馬腹奴酋戎心得無啓乎班仲升曰塞外吏士本非孝子順孫水清無大魚矣方當聞鞞鼓而拊髀乃以兵家常態輒棄

一將豈以出萬死一生微幸尺寸者必欲如隆準公入咸陽時耶魏武帝常下令求賢曰若必廉士而後可用則齊桓其何以霸也又曰得無盜嫂受金而未遇無知者乎故得百廉將而不勇不如得一勇將而不廉旨哉斯言敢告軍正

余讀六韜三略司馬法及孫臏吳起尉繚諸葛孔明諸書其言具備矣獨不一及屯田惟尉繚曰量土地肥饒立邑以城稱人以人稱粟數語何以田田何以屯未概聞也豈當其時師行糧從無煩儲峙抑皆如孫武所云務食于敵不必飛輓耶李將軍如松數爲余言鹽法旣壞遼之餉運艱矣大司農搏手仰屋徒自苦耳今駿雲寬奠之間灌莽彌望時歌每每皆肘腋也趙營平處此必不至棄沃野以資啓疆余壯其言嗟嗟亦孔棘矣勝國虞公集遼東屯田之議及我朝葉公盛胡公世寧管公懷理周公用張公居正石畫深謀纒纒具在不可覆按乎第是役也慮始固難樂成不易前膝借箸請以異日

余居長安浴佛之日數從諸同曹爲高梁橋之遊也寶馬香車在河之

疾如叢臺校服曲水被蘭佳麗遊觀太平有象矣而兒童走卒往往胡  
貌胡服闐溢原野卽童心貴介間亦效之豈是日也佛爲胡神故仍胡  
俗抑趙武靈王亦足效耶今閩粵之間亦復以鬱壘之役往往圖畫番  
胡余竊裂眦咄彼穢裘奈何履端俾其職室此嫠婦之恤周亦有之嘆  
蔡也

蓋復二州全遼之胸腹也沃壤繡錯距奴酋住牧雖有山溪之限第從  
三岔河渡江僅百里耳虜騎飄忽如風雨秋高馬肥冰堅可渡以一臂  
而搏遼陽拊我之背以一臂而搏蓋復刺我之胸何以應之况蓋復之  
濱日本相望鷄犬相聞間者關酋之役彼未屬饜何嘗一日忘我卽未  
必爲奴助臂而乘虛竊發倏爾揚帆能不震隣乎堦人之言家古營前  
大青山下一徑十日便可飲馬臨淄則江淮且騷動矣孫武子曰無所  
不備則無所不寡旣分身而東顧全遼復分身而南顧餉道竊爲當事  
者不下咽也

奴酋爲逋逃主十年於茲腹心牙爪實繁有徒非我析公則我雍子卽



四方逃死皆非卿材然下喬木入幽谷此其故難言之矣間者劉杜之敗豈皆覺勇嗇禍足性求名之罪乎余讀唐書回紇之有國也其人朴愿物力堅忍故驍健善戰難與爭鋒及登里可汗一通中國而盛飾宮室豢養子女國遂衰耗則我之逋逃實基之也今奴酋已數逋逃矣且廬居且火食華衣華語聲妓玩好更俗于華至烹天池新茗于春正之月以誇示我反使安知其不爲回紇之登里乎第我可以往彼亦可以來十年之間卒不得奴一人爲渾邪如把漢那吉以釣我趙全九人者此其故又難言之矣

有當事者堰渾同江入三岔河經虎皮城以限胡騎差得息肩此目前之計也搏而躍之可使過額能濬而蓄之可使安流乎水不能堅沙不能囊乎惟鴨綠一軍萬全最勝置而不講非當局而迷亦望塵而退耳余居西省日曾疏言奴酋十三事當事者以示樞臣蕭公大亨輒驚而走曰白面書生無故發大難之端令人閉目不敢讀掩耳不敢聽遂令當事者沮不得上今何如也一嘆一嘆

遼陽舊城之未失也廣寧至開原瞭守相望止二百餘里而已自顧把  
兔煖把兔伯牙兒入而住牧其中遂不得不迂其途至七百餘里增陣  
益障戍守艱繁全遼且坐困矣嘉靖間岳公倫欲徙朵顏諸夷于開平  
廢壘而以大寧地內屬非識時俊傑不足以語此按戎索而問舊疆毋  
曰此亦白面書生之談也

漢高帝置酒雒陽南宮與通侯諸將論吾所以有天下者子房蕭何韓  
信此三者皆人傑吾能用之余謂高帝非能用三傑乃三傑能用高帝  
耳高帝不爲三傑用足安得躡耳安得附一二日不見安得輒怒如失  
左右手耶歲庚戌虜薄都城時世宗肅皇帝方垂拱淵默嚴公嵩曰上  
幸一出視朝上不答徐公階從史之上曰可爾得無驟乎階曰虜鴟張  
中外心竇揣揣倚陛下而重得一蹕聲若亢旱之得雷霆寧驟也次日  
視朝甫嚴鐘而虜已告遁矣嚴徐二公能用肅皇帝如此夫兵詭道也  
潛于九天潛于九地可露章乎吳子曰善將者如坐漏船如伏燒屋又  
曰用兵之害猶豫最大三軍之災生于狐疑存亡呼吸非可旦夕待者

一日露章能數日候命乎語曰三日不見其間容刀家庭猶然况簾陛乎况戎馬生郊而不虞之薦至乎若朕不聞聲事鮮庭決見必因鬼席非膝前雖三傑復起安所得高帝而用之嗟嗟天威不遠顏咫尺漢室元勳自當歸之三傑

竊有疑焉徵調騷然幾半海內一投醪則蟻附一執爰則獸駭豈曰使鶴鶴實有祿位餘焉能戰乎是尙可爲國乎更可疑者磻溪起而牧野陳隆中出而鼎足立朝方登壇夕卽摩壘未聞杞梓羽毛犀兕丹漆四出拮据需以歲時而後卽戎者今釋筆橐以請長纓計當不介而馳剪此後食居然舌戰豈欲十年教訓如衛文公耶北關之內有養家奴逞家奴白虎遲輩三家者奴酋之婚媾也自猛孤呼羅之爭啓而交始絕故宰賽唯新婚于奴酋而三家者中斷其道卜台吉輩復中構之于是白羊骨金白失二酋往往見困于奴亦往往求援于我自北關一失其望亦絕矣然出幽還喬必不中變而同宰賽且已深奴隙自保漢恩嗟彼二酋當不負漢者或與之邢以爲子靈或與之苗以爲貴皇或置之

戎車之殿以謀申息此非陳曲逆所爲禱祀而求者乎金白二酋養逞支屬卜台吉江夷也

往行

薊州鎮

前言

魏煥曰薊州一邊拱衛京師密邇陵寢比之他邊尤重三屯營居中爲本邊重鎮東至山海關三百五十里西至黃花鎮四百五十里我太祖高皇帝驅逐胡元乃卽古會州地設大寧都司營屯等衛外山連絡與遼東宣府東西并列爲外邊命魏國公徐達于內西自古北口東至山海關增修關隘一道爲內邊神謀遠矣永樂初因兀良哈三衛部落內附乃徙大寧都司于保定置營屯等衛于順天以大寧全地與之今止守內邊邊人謂外邊山勢連亘千里山外撤江環遶誠自然之險也北虜不敢內侵三衛者以此今棄此而守內邊失地險矣

又曰薊州東至山海關西至黃花鎮爲關塞者二百一十二爲營堡者

四十四爲衛二十二爲守禦所三設分守參將五于燕河營太平寨馬蘭峪密雲縣黃花鎮以管攝營堡謂之開設守備都指揮五于山海永平遵化薊州山河以管攝衛所謂之營設總兵官一員于三屯營以總鎮焉開設于外所以防守營立于內所以應援本相須也後關獨當其害營但肆爲觀望嘉靖十八年巡撫都御史戴金題後該本部復仍如舊制更相防守

又曰自來論薊州邊者皆謂外邊山河並險內邊城堡疎夷外邊直而近內邊曲而遠從國初長久之計惟在驅三衛復舊制以守外邊若事勢難爲仍守內邊必從邊人長計據險要修牆堡增墩軍益邊糧以嚴防守其庶幾矣一內邊東自龍井關起西至黑谷關止邊城磬折計六百里夷地一區可田千頃乃在腹裏外有橫山一帶止百五十里相連高峙窺見內地虛實弘治間張都御史差指揮薛亮帶夜不收出邊將外橫山踏勘圖本甚詳蓋從其計修築外口橫山一帶不惟我據其險有地可耕且以守六百里之人堡移之守百十五里豈不省且便哉又

據致仕參將周楫稟議橫山一帶舊爲我軍架砲之所山外撒江經流眞自然之險

又曰內邊山雖斷續險處亦多但山外攀緣易上山空水道處所每年雖修壘二次皆碎石乾砌遇水則衝虜過卽平其何以守近年都御史戴金出邊巡視欲將山外可攀援之處塹崖削壁山項以內嚴令禁長林木岑鬱仍燒磚補砌山口水道使連亘如城險不可踰亦如陝西各邊之制更添墩堡以備防守此亦至計也

許論曰薊京師左輔也太祖旣逐元君乃卽古會州之地設大寧都司營州等衛而封寧王與遼東宣府東西並建以爲外邊又命魏國公徐達起古北口至山海關增修關隘以爲內邊太宗文皇帝靖難後兀良哈部落內附乃改封寧王于江西徙大寧都司于保定散置營州等衛于順天境而以大寧全地與之授官置衛令其每年朝貢二次衛各百人往來互市永爲藩籬卽朵顏泰寧福餘三衛也遼東宣府自此隔涉聲援絕矣正統以前夷心畏服地方寧謐但令都指揮或都督於喜峰

口密雲等處鎮守驗放別無多官土木之變頗聞三衛爲也先嚮導乃命都御史鄒來學經略之此後因而添設太監等官而夷情亦變詐不同然尙未敢顯言爲寇也弘治中守臣楊友張瓊因燒荒掩殺無辜邊釁遂起正德以來部落旣藩朵顏獨盛陽順陰逆累肆侵噬花當則脅求添貢把兒孫深入擄掠動稱結親迤北恐嚇中國參將陳乾魏祥俱以重兵前後陷沒他可知矣故三衛夷情難與往日例論禍機所伏不侍智者而知黃花鎮擁護陵寢京師後門今本兵逃亡止餘二百河間等衛之戍空名無實此其單弱極矣議者謂更當增戍而關外閒田可募爲兵此亦一策古北口潮河川俱稱要害而潮河川殘元避暑故道尤爲虜衝作橋則浮沙難立爲塹則漲水易淤都御史洪鍾雖曾設有關戍勢孤難守今須塞川大建石墩數十令其錯綜宛轉不礙水落庶幾可以久乎喜峰口三衛入貢之路撫賞諸費久累軍丁近聞取諸馬場籽粒似矣建昌營自裁革內臣之後以其兵多于燕河營乃復添設遊擊甚爲紕繆矣遊擊之名謂居中乘便四圖馳擊也今偏在東隅其

謂之何矧東去燕河營參將止五十里西去太平寨參將止六十里不爲贅員且掣肘矣愚嘗謂薊鎮在今當重其事權總兵須與掛印同巡撫住薊州其遊擊駐三屯營若燕河馬蘭密雲三參將則仍舊在以太平寨併入建昌爲一參將則庶乎體統正而緩急有濟矣且設關于外所以防守立營于內所以應援今關營提調旣分爲二則關獨當其害營但肆爲觀望耳假令營之提調卽司所直之關責有攸歸其將誰諉又本鎮額兵原少隘口甚多除分戍之外消耗之餘所在單弱言之寒心是故存留京操之士益募土著之兵設險修關嚴烽遠譟選將練兵足食明法曲突徙薪之計不可一日不講也

王瓊曰京師東至薊州又東至山海關其地北面山川險阨綿亘千餘里卽古營平之地國家于薊北設鎮以控制外夷又于境外建朵顏福餘泰寧三衛以示羈縻爲中國藩籬三衛夷人每歲入貢處代有常規不可因其狹求賞賚常格而啓輕侮之心若入境寇掠備禦亦有常法不可輕議增兵而使百姓困于輸輓此守鎮之道也



申用懋曰昌平古營平地北枕居庸東肩渤海西接橫嶺三面皆衝雖宣薊爲之屏蔽紫荊藉以聲援然外而扼控要害內而擁護皇陵稱重鎮云東接薊鎮大水谷下并連口地方西接保鎮沿河口運河地方查得居庸關黃花鎮邊城入達嶺菓田峪灰嶺口俱係衝地

又曰大寧等處番語兀濞河套稍南有煞母林稍北有老母林離薊邊五六百里此地有東虜土蠻住牧在薊東北在邊前屯衛西北相傳王子之后有打來孫子王文黑石炭等酋首嘉靖三十四年犯寬佃三十八年入通嶺三十八年入潘家口三十九年糾西虜入潮河川者是也又遼東境外有虜二枝一名魁猛可一名虎喇哈赤專爲難于遼西今爲土蠻牢安吞滾兔等酋

又曰薊鎮爲神京左輔國初宣遼聯絡鼎峙三關薊屬內地自大寧內徙三衛盤桓遂與虜隣矣遼分十二路轄以三協東則逼近遼左陸海兼防中則開設關口撫賞甚繁西則內蔽營平外扼曹牆潮古庚戌而後特設督臣駐節密雲與撫鎮互相控制年來修守漸完南北并練足

稱鞏固云

東起山海關西至大水谷抵昌鎮募田峪界邊長一千餘里鎮外係朵顏三衛屬夷東北係擦漢腦兒西北係青把都兒大壁只趕□等部落住牧查得山海關石門燕建昌太平喜峰松棚馬蘭牆子曹家古北石塘黃土大毛義院界嶺青山桃林冷口擦崖榆嶺董家口李家口潘家口洪山羅文峪大安口寬佃峪黃崖口符軍石鎮虜關吉家莊黑谷關司馬臺潮河川白馬關大水峪俱極衝

往行

宣府鎮

前言

景泰元年于公謙曰宣府大同地方卽日達賊侵擾去來不常或攻圍城池或剽掠人畜或以輕騎襲我輜重或以人少擾我官軍聲東擊西出此入彼邊民不得耕種士馬不得休息臣竊料此賊必欲搔擾大同宣府使我公私匱乏不能固守此其奸計不淺有必來侵犯京師之意

今朝廷所委任者石亨楊洪柳溥孫鏗衛穎范廣張軌數臣其次則署都督僉事張義雷通諸人今虜勢猖獗邊務方殷京師軍馬雖已操練頗有次第然萬人之命懸於一將將有必戰之心則士有效死之力苟計不先定心不齊一彼此異見而將無必戰之心上下隔絕而士無效死之力緩急之間恐悞大計乞勅石亨楊洪柳溥孫鏗衛穎范廣張軌張義雷通等各陳己見以爲今日虜勢如此之猖獗邊務如此之不寧當何處置可得寧妥萬一虜寇侵犯京師或近畿州縣及山西等處地方當何設法禦敵戰守或除戰守之外別有何策可以安邊保民不須會同計議文飾虛詞務在各出己長直言無隱令石亨等各另具題封進皇上聖斷擇其可行者請勅各官遵守施行若是果有空礙亦照各官陳奏必其上爲朝廷分憂下爲邊境除患不許面爲承順退有後言俟敵旣至互爲異同以悞國家大計况耕當問農織當問婢今日之事若不責成于石亨楊洪諸人而欲臣等書生之淺見加以議論則是徒爲紛紛而未能濟事也臣材本庸劣叨掌兵機切見方今邊務誠爲危

急思患豫防間不容髮萬一事無豫定倉卒生變臣雖萬死不足以贖  
李公秉曰臣聞制勝之方固莫先于講武以練兵安邊之策尤莫先于  
據險以固守照得獨石馬營等處城池形勢險隘官軍頗多戰守有人  
若賊寡則有寡不敵衆之心不敢輕進勢衆則有腹背受敵之患不敢  
深入又有都督孫安在彼提督號令頗嚴官軍知畏縱有警急亦無足  
慮所可慮者惟宣府而已竊照宣府迤北沿邊一帶大小白羊口當各  
青邊張家等口中間多有通行人馬去處正統初年該太監興安尙書  
魏源親詣彼處相度形勢築立城堡調撥精銳馬步官軍輪流守備以  
絕邊釁固安人心續該總兵官楊雄奏准將大小白羊等城堡原守官  
軍馬匹歸併葛峪堡操練此因青邊口張家口西陽河等處城堡係緊  
要去處仍前守備不曾歸併後因達賊犯邊前項城堡無人守備俱各  
廢弛及照青邊等處內近宣府外通沿河十八村等處况往宣府等處  
軍餘俱由彼處出入前去馬石等營盤運糧米被達賊搶擄者甚多此  
等之人深知嚮導是以被擄軍餘王春等入境奸細由此進入其原立

城堡若不仍前復設調撥軍馬照舊守備非惟無以嚴邊防誠恐有以啓賊意臣屢以此事與鎮守總兵等官栢玉等極陳利害商確施行柏玉等僉曰可行獨總兵官紀廣執迷不從說稱沿邊墩臺俱有守哨官軍便不守只也不防臣竊慮沿途墩臺相離通人馬去處城堡少者四五里多者數十里縱有奸細乘夜進入守墩之人豈能望瞭及照原守城堡卽今見存其守備官軍俱存宣府等處團操前項城堡缺人守備倘有奸細投間抵隙因而入境窺探虛實貽患非輕臣叨居言路之官濫膺參贊之任義所當言豈敢緘默如蒙乞勅兵部行移鎮守等官將不係歸併團操青邊等口緊要去處量撥官軍馬匹仍前修守分委都指揮或的當指揮一員專一在彼提督精銳馬步官軍輪流守備仍行見在參將楊龍量帶官軍于墩空添築墩臺以便瞭望其歸併大小白羊等處遺下城堡隘口仍分守備萬全右衛都督江福葛峪堡都指揮楊文提督墩臺都指揮梁泰等嚴督該管官軍常川遠在哨探以備不測不許怠忽以墮賊計務要關防周密而嚴謹隄備相機行事而邊境

無虞仍行都督紀廣從長斟酌如果要害去處可以不設守備本官別有禦寇長策令其明白奏請定奪具題奏奉聖旨兵部知道欽此

□□□日分守獨石營等處少監吉英題稱會同分守左參將楊紳議得所守獨石馬營等處俱係極邊衝要重地達賊犯邊速如風雨彼時鎮守內外參將等官楊洪等遇有聲息使得徑自具奏不敢悞事自成化十三年一例禁約不許徑奏臣等勘得獨石至長安嶺過居庸關到京路道如弓弦之直不過半日程期凡報聲息最爲便當其獨石至宣府往回將六百里若有聲息緊急待鎮守等官會議然後奏報到京其遲悞軍情理勢必至若不預陳下情貽害非細乞勅兵部計議如獨石遇有緊急邊情除開報宣府鎮守等官知會外仍令臣等本處徑自星馳奏報庶使邊務先得上聞路道不致往復奏抄到部參照宣府地方當朝廷北關各路分守參將等官皆聽宣府鎮守總兵巡撫等官總制凡有聲息報到軍馬應手即可立刻隨具奏聞于分當然若論調發援兵亦非一蹴能到本部比年計慮議奏節省驛傳一以爲總制官員朝

廷取信得以專制任事一以不使聽受節制官員開旁門捷徑沮壞邊務今吉英與楊紳議奏前情合無行令宣府鎮守總兵巡撫等官廖亨等轉行吉英楊紳今後遇有本處達賊入境聽其一面共差一人齎奏施行一面馳報廖亨等發兵應援其餘傳報炮火等項常事照舊馳報廖亨等卽刻處置不許失悞軍情

魏煥曰宣府漢上谷郡也國初常忠武王破虜于漠北卽元之上都設開平衛守之置八驛東則涼亭沈阿賽峰黃崖四驛接大寧古北口西則桓州威虜明安濕寧四驛接獨石太宗文皇帝三犁虜庭皆自開平興和萬全出入嘗曰滅此殘虜惟守開平興和大寧遼東甘肅寧夏則邊境可求無事矣後大寧旣以與虜興和亦廢而開平失援難守宣德中乃徙衛於獨石棄地蓋三百里土木之變獨石入城皆破雖旋收復而宣府特重矣今邊人謂獨石不如開平險隘可守宣府山川糾紛地險而狹分屯建將倍於他鎮是以氣勢完固號稱易守然去京師不四百里鎖鑰所寄要害可知北路獨石馬營一帶地雖懸遠然南阻長安

嶺虜難徑下中路之葛峪大白陽青邊諸堡西路之柴溝洗馬林萬全諸城南路之東西順聖皆稱虜衝警屢至焉東路永寧四海冶及龍門所則三衛窺伺之地而四海冶上通開平大路下連橫嶺兒又要地矣易曰王公設險以守其國今考塞垣所處險亦幾盡第時異勢殊有不可不爲之經畫者若曰補長峪城鎮邊城之募軍浮圖峪插箭嶺之防守留茂山衛京操之方以益紫荊築李信屯交界之堡以固兩鎮此豈容已乎且宣府之兵素稱敢戰矣乃近年參將都勳出境燒荒遇虜二十騎而潰關山王經前後陷沒此猶可諉也若滴水崖郭舉之叛及諸軍告糧而謀則漸不可長况伊爾大同耳目習染可不慮哉是故有撫綏之將而後有節制之兵有節制之兵而後有疆圉之固籌宣府者此其大計矣至以邊儲一節則員外楊守謙所論蓋得權宜之術附見於後以備一時參考云守謙曰嘗謂弘治中宣府各城粟茭之積多至有六七年者少亦不下三四年今則止數月耳倉廩僅存瓦礫場地鞠爲茂草或勢家佃以爲業然則飽歌騰槽之勢安得而復見哉邊鎮敝壞



亦至此極矣賴國威靈僥倖無事使遇也先火節之變將何以待之司國計者不可不深長思也宣府至京師僅三百餘里有必不得已之事則乞運之策可行也此蓋先朝所已試者亦一時拯溺救焚之方云又按邊軍月餉法曰折色六月本色者六月在邊者折銀七錢在內折銀六錢又曰本折間支此諸邊之通例也然春夏之月禾稼未登粟價騰踊邊臣苦於蓄積之未多也則固與之折銀秋冬之月粟價稍平倉廩稍積則始與之本色當其騰踊也銀錢或止易粟六七升或曰五升是一月折銀猶不足半月之粟如之何其不饑而疲且至死也欲責其死綏之節不亦難哉說者謂宜于歲例之外每鎮發銀十餘萬兩遇大熟之歲則于歲例招買之外糴粟六七萬兩中熟亦糴三四萬兩俱別儲之每春夏粟價騰踊若歲例之粟尙足支持者勿動惟騰踊之甚不可支持者借支二三月秋熟之後卽于歲例內招買者補償仍別儲之如此則士得實惠而所省亦且數倍卽有重大虜患徵發旁午緩急亦有所濟矣此誠今日之急務而司國計者所當講求云

王瓊曰宣府南至居庸關不及二日之程北去虜地近者僅百里許故宣府守臣奏報境外虜衆住牧則京師亦當爲之備正統己巳虜騎直犯京師由內無備也正德八九年間虜營移住威寧海子在宣府大同之間離邊不遠常由大白羊口入寇宣府遊擊將軍倪鎮張勛禦之敗死又由順聖川入寇蔚州等處又過雁門寇太原本處官軍皆不能禦遣威寧侯仇鉞都督白玉溫恭相繼出征所統皆京營弱兵調遣分布不得機宜令右都御史叢蘭總制宣府大同山西三鎮軍務牽制太甚二年之間糜費鉅萬未得機會與虜一戰正德十年虜衆西移住牧河套爲患陝西十一年春復過河東住威寧海子瓊得報卽奏請于團營選將練兵陰仿屯兵細柳之計是年秋虜賊又由大白羊口入寇逼近居庸時都督劉暉等卽統兵出關遼東兵外其營官軍出者不過六千亦皆精銳可用馬亦臚壯旣出與宣府兵合軍威大振虜營西移住大同境外劉暉等亦襲而西駐兵大同虜忽起營北去近邊哨無烟火方議班師虜乃由大同西問道入偏頭關寇鎮西是時延綏勁兵驍將先

已調山西三關內外按伏遂得合兵一戰虜賊大遭剄紐遁去雖曰天意謂無人謀不可也况自初出至班師首尾統三月費亦不多虜賊自鎮西一敗五六年來不敢復出山西三關豈非有所懲哉正德十二年虜營仍住威寧海子本部預奏設備視正德十一年尤爲周密大同鎮巡官哨探分布亦中機宜適車駕幸陽和虜賊入應州遼東兵已在陽和待奏方發稽遲大同總兵官亦在陽和回遲杭雄等雖遇戰不獲大捷惜哉

葉盛曰宣府在居庸西北其東自永寧衛南口起迤西至西陽河南土山臺大同天城衛界止一千九百七十三里三百二十六步沿邊腹裏墩臺隘口八百二十二座處有鎮守朔將軍總兵官副總兵左右參將參將所統萬全都指揮使司爲衛所者十有九爲城爲宿兵牆堡者共三十二蓋中軍宣府前左右三衛興和守禦所城一趙州大小白羊葛峪常峪青邊口堡六北路口外開平衛在獨石城龍門守禦所在李家堡有龍門衛城有馬營雲州赤城鵲鴉堡又有守長安嶺懷來衛中所

通爲城堡者八東路懷來永寧隆慶州左右保安五衛美峪守禦所又有守隆慶州永寧州後所隆慶保安二州永寧一縣而總爲城者五西路萬全左右懷安保安右四衛城三柴溝西陽河洗馬林新河張家口二堡五南路蔚州衛廣昌守禦所二城又有順聖川東城舊弘州西城而直隸隆慶衛在居庸糧芻亦屬宣府廣靈靈丘二縣隸大同府則惟發軍守戍焉成化元年修飭舊有拒敵僅五十二屯堡七十九新增築屯堡五百七十二新舊屯堡編以千文起天字屯堡止於字屯堡通七百三座增補虜使邊氓往來孔道暖鋪通前後共六十九座編第用字則知仁聖義忠和孝友睦婣任恤禮樂射御書數文行忠信教杜子美上韋左相八荒開壽域一氣轉鴻鈞霖雨思賢佐丹青憶老臣豈是池中物由來席上珍廟堂知至理風俗盡還淳云各屬原額屯操戰官軍舍餘土兵等六萬六千六百六十六員名是年報夏季數除逃亡外實五萬七千二百六十一員名實食糧文武官吏軍兵五萬四千八十八員名騎操走遞馬騾二萬三千四百八十二匹頭邊儲細糧一百五十五萬

九千二百五十九石三斗九升三合二勺馬料豆四十萬七千一百六十四石二升二合七勺銀一十一萬三百八十七兩六釐綿布三十七萬二千八百六十七匹二丈四尺四寸綿花三十五萬二千七百一十八斤二兩三錢馬草六百一十三萬九千六百八十二束六分奉勅管田者是年買補官牛五千七百一頭作一千八百九十八具零二頭墾地四千一百六十九頃六十畝收糧七萬一百二石二斗九升一合買馬一千五百一十九匹詳見玉音碑碑文所遺則是歲飼牛所餘藁秸八萬九千一百五十六束一分每束一十七斤重易銀二千五百二十兩四錢七分俱充公用衛所公務牛四百八十四頭地三百六十一頃八十五畝得糧八千九百五十二石一斗三升四合驛站公務九十五頭地九十一畝得糧一千八百一十二石六斗三升二合衛所以給公私百需站道以爲慰勞行役之費亦肇自是年繼是而有爲則月益而歲增矣

褚寶曰南路順聖川西城連接本鎮西陽河及大同天城陽和邊外考

虜賊大舉之坦途往年多繇此入犯紫荆關蔚州順聖川等處近年西路添設李信屯守把隘口似矣但西有地名鐵裏門一帶直通西陽河邊外平漫無險可恃亦難防守識者猶有憂焉若于天城鎮安寧鎮二堡之北修復大邊築垣三十里發兵守之兩鎮皆有賴而紫荆倒馬等關可無深入之患矣不然禍豈止于宣大已耶竇爲此懼嘗告于都御史王公深然之已嘗會同總督尙書翟公微參議蘇君偕大同參議李君會勘議助彼功三之一焉彼固尙爾徐徐爲之何哉况二堡多膏腴之田土人利之雖經虜患歲嘗募人自衛而不舍去若復益之以垣則樂耕牧之利者雖無兵而守自固也亦何憚而不爲耶此區區于順聖川懷安左等衛芻糧積之又不得不廣也

宣府去京師不四百里鎖鑰所寄北路獨石馬營一帶阻長安嶺虜難徑下中路之葛峪大白陽諸堡西路之柴溝洗馬林萬全諸城南路之東西順聖皆虜出入孔道東路永寧四海冶北路龍門所則三衛窺伺之地而四海冶上通開平大路下連橫嶺兒有不可不爲之經畫者故

補長峪城鎮之募軍重浮圖峪插箭嶺之防守留茂山衛京操之士以益紫荊築本信屯交界之堡以固兩鎮修張家口洗馬林西陽和諸處以塞中路之竇修永寧墩長安嶺龍門衛內垣以扼京後之衝策宣府者此其大計矣

徐文靖公曰按宣府乃古冀州所分幽并之地在戰國爲燕趙秦爲上谷郡漢唐以來皆領屬縣石晉時沒于契丹轉而爲金終宋之世不入中國元累改爲順寧府我國朝混一疆宇徙其民于內郡洪武間改稱宣府宣德中設萬全都司統諸衛所而內屬于後軍都督府宿以強兵統以主將監以內外重臣遂屹然爲朔方一巨鎮歷累朝列聖百有餘年聲教所被人物日蕃文軌日盛自有山川以來所未有也

申用懋曰漢上谷郡國初卽元上都設開平衛以控扼北虜東有大寧西有獨石以犄角開平自大寧徙興和廢開平孤立難守宣德中棄地三百餘里移守獨石獨石挺出山後虜犯必經宣之北門胡虜充斥矣東起永寧抵昌鎮黃花鎮界西至西陽河堡抵大同天城界邊長一千

二百餘里境邊外有虜酋黃台吉青把都等部落住牧查得獨石葛峪萬全石衛裴溝龍門靖胡四海冶馬營鎮安滴水崖赤城新河口新開口膳房張家口洗馬林西陽河俱極衝

往行

大同鎮

前言

許論曰大同古雲中地東至枳兒嶺西至平虜城川原平行故無山設險多大舉之寇西則平虜威遠中則右衛水口等處初設大同府分封代王外分東中西三路北設二邊拱衛鎮城西之平虜威遠中之右衛水口等處皆稱要害蓋虜南犯朔應諸城必窺之路也東則天城陽和爲虜入順聖諸路之衝北二邊俱壤虜至直抵鎮城况虜在套中而平虜西近老營堡與偏關近虜蹤出套便涉其境故大同稱難守焉先年邊政嚴明警備差緩自多故以來大邊已失二邊之內棄爲王庭墩軍騎情警報不明至有與虜通貨入而後報者他可知矣以地利言則議



者曰五堡決不可不復高山聚落之成是宜當增以人事言愚以爲正紀綱明法令第一義也夫張文錦之敗是彼處置乖方而激成之也李瑾之死則是處文錦之事未善而養成之耳今日之事愚又隱憂矣默化潛奪不震不驚爲天下四方觀聽非豪傑之士忠義之臣其孰能爲之吁可易言哉夫修五堡有三利焉藩屏外固內地獲安一也沃土茂田富庶可期二也二邊旣復宣寧等縣棄地亦漸就理三也文錦失處而致變後人懲噎廢食可乎高山聚落二堡蓋在鎮城兩腋間實爲東南虜衝募軍分駐則按伏之費省犄角之勢成無容議矣顧募軍之糧所宜亟補耳北虜貢路例在大路先襄毅巡撫時三年三貢各邊寧謐者數年往歲榆林款塞說者謂似步和議而不納豈典章未諳耶夫北虜稱款難也乃自疑阻然則歲歲侵暴而勞費者是當然耶河南山西歲運多不及額而屯田又多逋負是故足食之計非例外發銀專官糴買吾無策矣夫馬之衰耗弊在各城搶兌此在軍之害當事者不可不知耳偏頭寧武鴈門三關各稱要害而偏關逼近黃河焦家坪娘娘灘

羊圈子等處皆套虜渡口往來蹂躪歲無虛日尤爲難守今防守之兵半是民壯馬又小弱非太僕寺所兌者扶傷救死之不暇而責以敵愾難矣或謂己巳之變大同徵山西之兵防禦者蓋幾七千今在鎮城止供薪水門戶之役而坐糜糧餉分毫無益若改戍三關給以太僕寺之馬民壯數千盡爲除草此不惟邊防有賴而所省亦且不資矣夫魏尙李廣皆守雲中尙給士卒餉軍吏無所不至廣遠斥堠就水草頓止人入自便是以能用其衆以致匈奴今之邊臣有愛將士若此者乎先襄毅巡撫之日雖不敢擬之古人至裁占役禁掊剋恤調遣優死傷未嘗不誠心以求之是以鎮人至今不能忘焉今平日恩德旣無以結其心臨時節制又無以宣其威不幸有變遂因而爲姑息之政姑息必疑疑則阻威之不服而恩之不感是誠驕悍之習雖魏尙李廣豈能馭之哉繇今之道馭今之兵厝火積薪因以爲安吾不知大同所終也

魏煥曰大同鎮城高拱完固內設山西行都司管轄東西二路一十五衛所鎮守總兵一副總兵一遊擊將軍二坐營官一統領本鎮并河南

春秋二班輪戍官軍東西北三路各設分守參將一員以守一路設守備都指揮一十七員以守一方北去鎮城九十里舊爲二邊又九十里爲大邊各牆堡聯絡以限邊夷後兩邊俱壞嘉靖十八年復築弘賜鎮川鎮邊鎮虜鎮河五堡于二邊內去鎮城五十里五堡添設守備五員弘賜堡居中復添設分守參將一員屯兵戍守以漸修築則大邊可復援鎮寄者當留意焉

又曰國初驅逐胡虜築內外二邊牆各屯軍牧膏腴可耕糧餉亦足後俱失守棄爲虜地嘉靖初巡撫都御史張文錦議築五堡于內邊爲耕守計誠是也委參將賈鑑徙城中居人從事而刳以威時重遷者效尤甘肅遂殺鑑鼓噪附虜文錦招來之繫官旗于獄叛軍復殺文錦輔臣建議撫之每軍仍賞銀三兩始定議者謂撫叛則可賞叛則非此所以開後日之隙也五堡遂已由是虜寇內侵無虛歲十八年總督尙書毛伯溫議復築五堡令本邊軍民欲徙者聽人皆樂從而五堡成堡外牆塹一新虜不敢近但人稀無積糧耳苟能招來充積使內邊固外邊以

漸而成大同無憂矣

□□□曰大同在九邊中最爲絕塞國初于鎮城外分中東西三路設大邊二邊捍虜自東勝豐州不守雲川玉林內遷重邊盡爲虜窟嗣後增築鎮邊殺胡丫角一帶增置雲岡雲陽諸堡東西相望臂指相使三雲形勢大非昔比矣顧高山聚落二堡在鎮城左右虜實衝焉募兵分駐則犄角勢成然後全鎮永爲不拔之基偏頭寧武鴈門皆要地往虜入大同川二邊則鴈門當其衝寧武諸營堡不甚險隘虜由喬麥川野豬口入而遊兵百里赴援甚難偏頭地平可馳馬又逼近黃河焦家坪娘娘灘等處皆虜賊渡口曩多虜患西北冬備河曲東北時時備大同川前時險塞設關邏夫環戍戍卒荷戈守吏辦符行者脅肩曳踵左右森立後禁解網弛廢釐缺斤左右環立不問誰何况覈符券遂至有虜細出入羣來旅往防乎防乎責在關吏矣若扼陽方之口塞甫川之衝嚴水泉營一帶要區且增撫臣于偏關而以大將駐老營副將駐河曲有警則山西撫臣親提太原汾州二營之兵以守寧鴈甚急則調各州

縣之兵以遇奔突有如先年經略王宗沐酌議尤當蚤夜以圖者又安得以三晉爲內地而易視之也

史公道曰大同鎮城迤北一帶東抵陽和西盡高山一百四十餘里俱係平川曠野黃沙白草直與虜境通連故我太祖高皇帝迅掃腥膻之后卽以此爲胡馬奔衝之會特建此雄鎮猶砥柱之在中流將使虜酋不敢背城南下輕犯倒馬紫荆等關然以一城孤懸天外漫無重山疊嶂之險容或我備少失其固一騎長驅直至城下是以從來本鎮地方遭殘蒙患特甚諸邊常年四月以至十月塞草暢發之餘秋高馬壯之日縱橫侵擾四流奔刦日無定時東出則西入此往則彼來必須動調兵將常川防守其追逐按伏糜費額外錢糧以歲計之不下數十餘萬然而邊民罹殺擄之災戰士遭鋒鏑之慘卒有不可免者先年原議創置五堡之人蓋亦的見各該險要處所果能立堡設兵眞爲我國家億萬年永逸之計因而奮迅以爲無所顧忌英見遠慮謀國未爲不忠但其舉動之間罔識通變重拂羣心事方草創之初輒構非常之禍自是

之後有聞人言及五堡之事者搖手閉目未敢出聲以應殆色變于虎之談矣先是巡撫都御史樊繼祖增展高山聚落二城而大同鎮城已若兩腋生羽之漸亦將有進圖五堡之機也但以初承兵變之後在于事會之違不可遽遂本年二月間時方大虜壓境該總督尙書毛伯溫奉命總督三鎮軍務前來首倡是舉合衆爲謀籌度兩月乃于召募聽其自來夫役豐其糧犒以至木料磚石等項一皆預爲計算分處停當召募一加遠近響應三日之間執姓名以願從斯役不下數千餘人因遣指揮總督官梁震前去先年原議設堡地方周詳體勘務得地勢高聳水草便利可因者因之可改者改之鎮城迤東六十里洞子溝之南原設鎮胡廢堡四匝溝岔道路崎嶇如遇虜衆攻圍轉輸救援一時不可卒至該堡稍西地名南車房土脈肥厚地勢高阜就此創立一堡與關頭北車房等處相拒虜賊不敢似前直犯腹裏擄掠安于等山及聚落等處地方矣及鎮城東北四十里水盡頭原有舊堡地僻殊非險衝土乾不便汲水仍移向稍東平崗之地則四望豁敞戰守得獲矣又紅

寺舊堡在鎮城正北當諸邊適中之處原額舊堡規度狹小氣概不雄況經年歲之久風雨披塌遂成丘土合當開展擴充易舊成新中間多增軍馬于此管攝諸路兵將若遇賊警忽至互相傳報從而併力捍禦眞有一呼千應之據也又紅寺稍西有張布袋紅土等溝俱係當年暗通賊虜便路不有所處則紅寺雖存未免孤立無助西二十五里有護堡村正當前溝通會之地于此立堡則東援紅寺北控諸溝一應零星之賊無從潛地而入矣又西五十里沙河舊堡設在沙河北岸然而坐陷淤泥之間甚非其所乃于河南好女村立堡則北距河險東與護村等處聲勢聯絡賊騎不敢肆然南渡矣前項應設五堡展築者一創修者四紅寺改名弘賜堡南車房改名鎮遠堡水盡頭改名鎮川堡護村改名鎮虜堡沙河堡改名鎮河堡弘賜添設參將處所週圍丈尺宜用三里五分高二丈五尺厚二丈五尺內應置馬軍五百步軍六百共該一千一百名其餘四堡俱二里三分亦高厚各二丈五尺宜各置馬軍三百步軍三百共軍六百名弘賜堡應立把總四員鎮遠等四堡各把

總一員每軍一隊應有管貼隊軍旗舍二員名共該把總官八員管貼隊官旗舍一百四十員名又議得五堡雖立若于堡外不有隄防則賊之往來馳驟何以距阻不設眼目則賊之動靜何以預知堡中之人不惟出入未便而守戰機宜亦何所憑應于西北一帶深挑壕塹一道沿壕築立墩臺各設旗軍哨守則壕塹之深險有以分內外勢而賊馬不可遽入墩臺之密布有以設耳目之多而警報易以飛傳五堡之外又生一藩籬矣又議得五堡設立處所俱係往昔賊虜常川住牧之境今卽于此地坐驅四五萬餘衆勞數月中間事變或難憶料其所關係有非輕細仍會置夜不收通事家丁人役數百餘人分投晝夜伏住二邊緊要墩臺及山崗高阜去處兼督守瞭人役加謹瞭望挑挖深闊營盤以爲官軍夫役棲守之所虜賊不時入犯各該將領督令附護官軍控弦以待虜賊一見驚愕知備每每悵快出奔不得以遂貪噬而各該守備分投營領料理得以從容就事日有成功其防護兵馬行糧草料俱於管糧郎中詹文光處計日給發而調集到各處軍民夫役口糧俱于



通判張烈收貯總督軍門原發銀內關支仍于本年四月十八日爲始齊力興工不時齎領米麵肉酒分投前去各該工所唱名給散以示存恤慰勞之意至五月初五日鎮虜堡城完初八日鎮河堡城完十四日鎮川堡城完二十八日鎮虜堡城完六月十九日弘賜堡城完各將所部兵馬分投摘撥一半架梁一半協同各路軍民夫役長挑壕塹一道遇土則挖逢石則鑿東自陽和西抵高山俱接陡山一百六十餘里深一丈三尺疊土爲牆一丈四尺上下二丈七尺寬一丈五尺沿壕外面每二里餘築打墩臺一座共六十餘座每墩起蓋房屋二間合爲一間其各墩應有鍋甕器皿旗幟號帶弓箭盔甲鎗刀火器俱各置辦完全逐一布設隨于每墩會同各選官軍六員名令其常川輪流哨守一遇有警一面酌量賊數多寡張掛青黃白色號帶傳示諸路瞭望之人依照傳報預爲戒嚴收斂一面摘撥一人下墩踰壕星分馳報各該分定城堡以憑會報合兵又弘賜堡稍東南十餘里五堡分中處所一山特起舊名平山絕頂之上曠然平地膏腴之田連山幾于千頃升巔撫首

四望五堡俱在目中萬一各堡有事于此覘瞭賊數多寡去來方向極爲真的即可據之進兵援勦况乎緩急之際標號昭傳合散呼斥遠近可以畢見即于其上創一小堡名爲會遠中設公館一所以爲會發兵馬之處更立一墩臺安置官軍二十員名專一掌管號令常川哨守五堡及鎮城之中朝夕瞭望依藉乎此則賊虜出入多寡有無之縱不可逃矣各堡公館及參守衙門并官員大小營房至八月十五日以後俱已報完督令商人分投召買弘賜堡糧六千七百石料三千五百石草十萬束鎮邊堡糧三千七百石料二千石草五萬束鎮川堡糧三千七百石料二千石草五萬束鎮河堡糧三千七百石料二千石草萬束以上五堡共糧二萬一千五百石料一萬一千五百石草三十萬束行令陸續運至收受堆集縱或事出倉卒亦足爲備先于四月內盡將挑入壕塹之內附近五堡土田盡數丈量除將餘地查照近奉欽依內事理欽遵外先行分撥該路參將五十頃守備每員十頃把總每員二頃每軍一名一頃共該三千九百四十頃隨復各照員名地畝分給牛具種

子行令參將及守備等官督勤趁時耕種然而漫草荒沙一望無際之鄉盡皆嘉穀秀實之境會逢比歲雨暘時若遂成大熟今卽登場入堡各該新募軍士俱各攜持妻子安插在內從容坐食亦若安土樂業率以生生無窮是期矢死邊陲爲終矣五堡設於大同迤北一帶空闊之處屏翰一方足爲全鎮巨防尤宜添設通判一員住劄弘賜堡內專一管理各堡錢糧詞訟并查革一應奸弊設有倉場則當有大使一員攬典一名僉派斗庫人役鑄給印信其召募新軍合將弘賜鎮邊二堡附大同後衛鎮川鎮虜鎮河三堡附大同前衛各食糧五堡主兵官軍三千六百一十七員名馬一千八百匹臣會同管糧郎中詹文光議照以一年計算本折色月糧冬衣布花四季哨備行糧并馬匹料草共該用銀六萬八千三百二十五兩二錢二分客兵官軍以三千員名馬三千三百匹往還按伏截數約算二箇月行糧料草共該用銀一萬九千六百二十九兩二項通共用銀八萬九千九百五十四兩二錢二分此係的不可少之數又弘賜堡應設神機庫一所合用一應神鎗佛朗機銃

炮各該新軍俱有隨伍居住餘丁一遇賊衆侵擾亦可併力戰守合用  
盜甲弓箭鎗刀等項除臣自行設處贖罪紙贖等項無礙銀兩動支四  
千四百五兩三錢九分已經督令成造給軍外恐未足用必須仍得一  
千五百餘副方克有濟

王公瓊曰今雁門寧武偏頭三關在太原北境密邇虜地者也雁門之  
東北爲雲中卽今大同府朝廷于大同屯兵命將鎮守固足爲太原之  
屏蔽然虜自西北爲邑而入則大同路遠亦不能爲之援正德九年虜  
賊大舉過雁門深入崞代逼近晉城大同諸路兵應援不及虜賊得利  
而出正德十一年春邊臣奏報虜賊大營移過河東威寧海子住牧山  
西亦報瞭見境外烟火五十餘里瓊料是歲秋必又入寇乃預爲之備  
旣申嚴宣府大同之邊備復奏令山西嚴設守備又奏請遣將出師差  
大臣督餉又奏調延綏兵馬過河于偏頭關等處住劄又奏留巡撫官  
不必改調又奏提宣府失事總兵官下獄分布旣已得宜人心又知警  
懼是年十月虜賊大舉由偏頭關入寇諸將合兵擊殺遂有鎮西之捷

虜賊百餘年來入寇始遭此挫亦足以少伸中國之威矣

翁萬達曰據守無險步兵日危列營歷時客兵日費二弊不去予終負國家也爲安邊書上之曰宜罷徵兵于內省分鎮兵于外藩使山西藉備于大同大同需力于山西又言北邊大勢大同最難守次宣府次山西之偏老分之則大同最難守者北路次中路次東路宣府最難守者西路次北路次東路乃尋昔年修築規轍區別緩急酌量工役及議山西大同併守事宜條陳乘城之目及乘塞之目悉見施行

尹耕曰吾記童時有事鎮城也抵北門不敢出闕觀焉其時北郊二十里許曰孤店者虜日至之巡撫史道之視地形也飯於北極神祠虜忽突至望麾蓋集矢如蜩諸軍力戰以免故張文錦之五堡識者恨其不究自總督毛伯溫之主弘賜議也由是鎮城以北商賈行矣尙文城滅虜九堡以聯其兩翼而後爲拒牆五堡以厚屏其肩背則五堡不爲極塞而鎮城腹裏矣然人猶爲拒牆五堡危之茲城其經條理矣由是而推則宣府之興和不可理而復黑山之垣不可引而直東勝豐榆之境

不可漸而圖非計也

申用懋曰大同古雲中地國初于鎮城外中東西三路設大邊二邊捍虜自東勝豐州不守雲川玉林內遷重邊盡爲虜窟嗣後增築鎮邊殺胡丫角一帶增置雲岡雲陽諸堡東西相望聲援相連三雲形勢大非昔比矣東起天城抵宣府鎮西陽河界西至井坪抵山西北樓口界邊長六百四十餘里境外順義王并把漢那吉征力艱兀填褴腰五路台吉等部落住牧查得天城平遠新平保平守口靜虜鎮邊鎮川鎮羌鎮川得勝拒門助馬拒牆破胡殺胡鐵山雲石威虜弘賜滅胡寧虜諸堡俱極衝

又曰山西在諸鎮爲內地自虜北據東勝而雁寧衝西據河套而偏老震如雁寧入則由代寧而南下矣偏老潰則由保河而深入矣故辛丑犯澤潞壬子犯太原甲寅犯繁代丁卯陷石州邊患孔棘云東起北樓口抵大同井坪界西至娘娘灘過河抵延綏黃甫川界邊長二百餘里境外係虜酋扯力銀等部落住牧查得北樓口樓子營神池老營堡草

梁山河會河口泉曲偏頭關俱極衝

往行

### 山西偏頭關

前言

申用懋曰板升自豐州難以西至黃河三百餘里皆板升所據自趙全伏誅後其餘黨丘富等居之今屬恰台吉分部

王公士性曰全晉要害山西初守東勝東勝失而後設總兵退守偏關是置關增塞偏頭最先與宣大等其後嘉靖二十年虜寇朔州守將戰死當事者虞于內突始退總兵于寧武稱者遂并舉三關爲言乃至今撫臣之設亦惟止大同雁門而不及偏老豈談晉事者不察于其內外輕重之異乎不知此三關者偏老爲邊而寧雁爲腹也大同居東北爲左臂偏頭老營居西北爲右臂此山西之極邊也外戶者大同以內爲雁門偏老以內爲寧武二關並峙而寧雁以內爲省會故寧雁重門也外戶以屯重兵進與之戰重門以嚴扼塞退爲之守是國初之畫也故

虜未有越大同至雁門者夫既守在大同矣則雁門之守爲贅乃今巡撫春居省會秋出代州以防雁門則是東路之備可謂詳矣何獨于西路則大將舍偏頭關而退守寧武若此之疎乎乃徒以巡撫遙制于偏老六百里長邊之外夫板升降人潛通內地撫臣既遠人心易搖兼以虜隔一牆朝發午至而此地又當互市之區爲夷使窺伺之所向者石州之敗虜卽從此入蓋欺偏無備不足以斷其後耳使當時駐以大將虜安得深入重地而不一回顧耶此可爲寒心竊恐大羊因沿踵習不至于首禍不止也臣謂可移寧武總兵駐偏關而以參將駐寧武山西撫臣則兼巡寧雁大同有警則出雁門偏頭有警則出寧武以策應之庶邊關無間可乘誠保障全晉之上策也而非憶說也屢年按視諸臣有議及者矣夫北虜機宜把漢悔禍順義請封邊塞官軍遂一切習爲偷情而不知今昔不可以同視何也俺答蹂躪半世壯志已盡老而厭兵且又顧其孽孫之愛必不以盟約恃此當時諸臣所以能逆料于先也黃台吉素懷桀驁向以壓于老酋之故今老酋故矣把漢那吉死矣



部落屬之不下二三十餘萬語云虺蛇終日而不噬則噬草木以殺其毒非其天性固有然耶或者曰一順義死一順義襲其欲悖盟也者安肯以封爵請夫鷲鳥將擊必斂其翼兵事猶然也酋雖虜也亦以桀名何以明其不然耶或又謂黃台吉亦且老念不及此夫壯力指方離其父而蓄鳴鏑反射之心且又驍雄甚邊人謂其不減俺答脫一旦黃台吉溘逝此酋新握其衆狼心欲逞風雨飄忽宣大二邊多事方始矣臨事而爲之備則緩且無及聞之邊關之上十餘年來長技棄捐士馬苦窳卽向時超距之士止以備修築工役而精銳無餘矣夫器物久而不操則與手不相習筋骨久而不用則與勞不相習事變不常戎心叵測安得晏然如俺答把漢尙在之日耶爲今之計宜勅各督撫着實修舉戎事暫停工役挑選精銳簡練以備未然勿阻目前燕雀之知誠邊關急務也

往行 四